

Tshoboko Ya Thuto Ya Baptist Ya 1689



William Kiffin ke o mongwe wa bao ba tsereng ketapele mo thagisong ya boipolelo jwa tumelo.

Ketapele

Bukana e ya Tshoboko ya tumelo ya Baptist e o e tshwereng mo seatleng sa gago e ranoletswe mo temeng ya Setswana ka thuso ya mpho e ntle ya mme yo o rategang wa Mokeresete, yo o neng a na le morwalo wa kgaogana dilo tse ka boammaaruri di dumelwang mo gare ga rona le batho ba buang Setswana mo Aferika Borwa le Botswana. Kwa ntle ga mpho e ntle ya mokaulengwe yo o rategang yo, maiteko a a ka bo a sa fitlhelelwa. Kwa go ene re rata go isa malebo a magolo.

Tshoboko e ya tumelo, e kwa tshimologong e neng e kwadilwe Sekgowa ka ngwaga wa 1689, e setse e ranoletswe mo ditemeng di le mmalwa, mme e e ka tswa e le yone teme ya seAferika ya bobedi go nna le monyetla wa go bala dithuto tse di agileng dikereke tsa *particular Baptist* mo dingwageng tse 315 tse di fetileng, ka puo ya ga bone.

Re tshepha gore go ntsha thanolelo e go tla a thusa go kgothatsa kitso ya Baebele le dithuto le go thusa maBaptist ba nako ya rona go atamela gaufi le batlapele ba bone ba *Reformed Puritan* le Baptist.

Thanolelo e e ikaegile ka thanolelo ya ga Andrew Kirkham, ga mmogo le e e neng e gatisitse ke ba Carey Publications ke setlhogo sa "Dilo tse di dumelwang mo gare ga rona ka boammaaruri". Re tsere kgololesego ya go adima go tswa mo ditimaneng tse dintsi tse di sobokilweng ke Rre Samuel Waldron kgatisong ya gagwe ya "... *Modern exposition of the 1689 Baptist Confession of Faith*". Re rata go lebogela batho ba gore ba bo ba re letleletse go dirisa ditiro tsa bone.

La bofelo re rata go leboga Moruti Bonang Lekoba, go ba a tsere matsapa a go ranoletsa tshoboko e ya tumelo mo puong ya Setswana. Re dumela gore maiteko a gago mo Moreneng ga a ka ke a nna lefela.

Fa bukana e e ka godisa go thaloganya Baebele le dithuto mo Batswaneng maiteko a mongwe le mongwe a tla a bo a lebogilwe go menagane. "A re tshegetseng boipolelo jwa tsholofelo ya rona re sa etsaetsege"

Ronald Kalifungwa

Mo boemong jwa bagolwane ba Lynnwood Baptist Church

SUMMARY OF THE CHAPTERS

1. KA GA DIKWALO TSE DI BOITSHEPO.
2. MODIMO LE BORARO JO BO BOITSHEPO
3. DITAOLO TSA MODIMO
4. LOBOPO
5. TLHOKOMELO
6. GO WA, BOLEO LE KATLHOLO YA JONE
7. KGOLAGANO YA MODIMO LE MOTHO
8. KERESETE MOLETLANYI
9. THATO E E GOLOLESEGILENG
10. PITSO
11. TSHIAMISO
12. GO FIWA BONGWANA
13. NTLAFATSO
14. TUMELO E E BOLOKANG
15. TSHOKOLOGELO MO BOTSHELONG LE POLOKONG
16. DITIRO TSE DINTLE
17. GO NNELA RURI MO TUMELONG
18. KA GA TLHOMAMISO YA TSHEGOFATSO LE POLOKO
19. KA GA MOLAO WA MODIMO
20. EFANGELE LE BOPHARA JWA TSHEGOFATSO
21. KGOLOLESEGO YA SEKERETE LE KGOLOLESEGO YA SEGAKOLODI
22. KOBAMELO, LE LETSATSI LA MORENA
23. MAIKANO A A LETLELSEGANG
24. PUSO
25. LONYALO
26. KEREKE
27. BOKOPANO JWA BADUMEDI
28. KOLOBETSO LE SELALELO SA MORENA
29. KOLOBETSO
30. SELALELO SA MORENA
31. SEEMO SA BATHO MORAGO GA LOSO LE TSOGO YA BASWI
32. KATLHOLO YA BOFELO

Kgaolo 1 Ka ga Dikwalo tse di Boitshepo

1. Lokwalo lo lo Boitshepo ke lone fela kaelo e e lekaneng, e e tlhomameng, e e senang phoso mo kitsong e e isang polokong, tumelo, le kutlo (kobamelo). Lesedi la tlhologo, le ditiro tsa lobopo le la tlhokomelo ya Modimo di supa tshiamo, bothale le nonofo ya Modimo, mo e leng gore go tlogela motho a sena seipato, le fa go ntse jalo tseo ga di a lekana go kitso tlisa ya Modimo le go rata ga gagwe e e tlhokegang go isa polokong. Ka jalo go kgatlhile Modimo gore ka dinako tse di farologaneng le ka mekgwa e e farologaneng go itshenola, a ba a phasalatsa go rata ga gagwe mo kerekeng ya gagwe; le morago ga moo gore boammaruri bo babalesege a bo bo tswelele pele, gore kereke e tlhomiwe e bo e kgothadiwe kgatlhanong le sebedu sa nama, le maretshwa a ga Saatane, le lefatshe, go dira gore tsoitlhe di kwalwe; se se dira gore Dikwalo tse di Boitshepo di thokege, ka ntlha ya gore ditsela tsa bogologolo tse nne Modimo a senola gorata ga gagwe ka tsone di eme. 2 Tim 3:15-17, Isa 8:20, Luk 16:29, Baef 2:20 Bar 1:19-21; 2:14,15, Dip 19:11-3, Bah1:1, Dia 22:19-21, Bar 15:4, 2 Pet 1:19, 20
2. Ka fa tlase ga leina Lokwalo lo lo Boitshepo kgotsa Lefoko la Modimo go fitlhelwa dikwalo tsa Kgolagano e Ntsha le Kgolagano e Kgologolo. Dikwalo tse ke tse:

Kgolagano e Kgologolo

Genesisi	1 Ditirahalo	Dikhutsafalo	Hagai
Ekesodo	2 Ditirahalo	Esekiele	Sekaria
Lefitiko	Esera	Daniele	Malaki
Dipalo	Nehemia	Hosea	
Duteronomi	Esethere	Joele	
Josua	Jobe	Amose	
Baatlhodi	Dipesalema	Obadia	
Ruthe	Diane	Jona	
1 Samuele	Moreri	Mika	
2 Samuele	Sefela sa Difela	Nahume	
1 Dikgosi	Isaia	Habakuke	
2 Dikgosi	Jeremia	Sefania	

Kgolagano e ntsha

Mathaio	1 Batheslonika	2 Johane
Mareko	2 Batheslonika	3 Johane
Luke	1 Timotheo	Juta
Johane	2 Timotheo	Tshenolo
Ditiro	Tito	
Baroma	Filemone	
1 Bakorintha	Bahebere	
2 Bakorintha	Jakobe	
Bagalatia	1 Petere	
Baefeso	2 Petere	
Bakolose	1 Johane	

Tse tsotlhe re di neetswe ka tlhohlheletso ya Modimo, gore di nne kaelo ya tumelo le botshelo.

2 Tim 3:16

3. Dikwalo tse di tlwaelesegileng ka leina la "Apocrypha", tse di sa tlhohlhelediwang ke Modimo, ga di tsenngwe mo motheong kgotsa tsamaiso ya Baebele, mme ka jalo ga di na taolo epe mo kerekeng ya Modimo, e bile di ka se ke di amogelwe kgotsa tsa dirisiwa go gaisa dikwalo tse dingwe tsa setho.
Luk 24:27, 44, Bar 3:2
4. Taolo ya Lokwalo lo lo Boitshepo, e e dirang gore lo dumelwe, ga e a ikaega ka bopaki jwa motho ope kgotsa kereke, mme e ikaegile gotlhelele mo Modimong (yo e leng boammaruri ka boene), yo e leng ene mokwadi wa Baebele; ka jalo e tshwanetse go amogelwa ka gore ke Lefoko la Modimo.
2 Pet 1:19-21, 2 Tim 3:16, 2 Bath 2: 13, 1 Joh 5:9
5. Re ka kgothadiwa ra ba ra tshikhinngwa ke bopaki jwa kereke ya Modimo gore re tseele Lokwalo lo lo Boitshepo kwa godimo le ka tlotlo. E bile kgalalelo ya diteng, bokgoni jwa thuto ya lone, bogolo jwa mokgwa, tumalano e e fa gare ga dikarolo tsa lone, bophara jwa lone (e e isang kgalalelo kwa Modimong), tshenolelo e e tletseng e e lo fang ka tsela e nngwe fela ya poloko ya batho, le tse dingwe dintlha tse di se ka keng tsa tshwantshangwa le sepe le botlalo jo bo feletseng jwa lone- tse tsotlhe di fa mabaka a a tiileng a bosupi jwa gore tota se ke Lefoko la Modimo. Mme, le fa go ntse jalo, kgothatso e e tletseng le tlhomamiswa ya boammaruri jwa lone jo bo senang selabe le taolo ya semodimo e tswa mo tirong ya Mowa o o Boitshepo ya mo teng o o fa bosupi ka Lefoko la Modimo mo dipelong tsa rona.
Joh 16:13-14, 1 Bakor 2:10-12, 1 Joh 2:20,27
6. Tshenolo yotlhe ya Modimo ka dilo tse di tlhokegang go mo galaletsa, poloko ya batho, tumelo le botshelo, di ka tswa di le mo Baebeleng ka mokgwa o o fitlhegileng kgotsa o o papamatseng. Ga go a tshwanelwa gore go tsenngwe sepe, a e ka tswa e le tshenolelo e ntsha ya Mowa, kgotsa dingwao tsa batho. Le fa go ntse jalo re amogela gore lesedi la Mowa wa Modimo le a tlhokafala gore motho a tlhologanye dilo tse di senotsweng mo Lefokong go isa polokong. Gape go na le dintlha dingwe tsa kobamelwa Modimo le tsamaiso ya kereke tse di tlwaelesegileng mo sethong le mo mekgatlhong tse di ka tlhomamisiwang ka lesedi la tholego le tlhologanyo ya Sekeresete, mme di tsamaelana le melawana e e akaretsang ya Baebele e e tshwanetseng ya salwa morago ka dinako tsotlhe.
2 Tim 3:15-17 Bag 1:8,9 Joh 6:45 1 Bakor 2:9-12 1 Bakor 11:13,14; 14:26,40
7. Ga se dilo tsotlhe mo Baebeleng tse di tlhologanyesegang ka go tshwana, e bile di tlhamaletse mo mongweng le mongweng. Mme le fa go ntse jalo, dilo tse di botlhokwa go itsewe, go dumelwa le go obamelwa go isa polokong di beilwe ka tsela e e tlhamaletseng a bo tsa tlhalosiwa golo gongwe mo Baebeleng, e seng fela gore barutegi mme le ba ba sa rutegang ba tle ba tlhologanye ka botlalo ba dirisa mekgwa e e tlwaelesegileng.

2 Pet 3:16 Dip 19:17; 119:130

8. Kgolagano e kgologolo ka Sehebera (e le teme ya tshaba ya Modimmo ya Iseraele bogologolo) le Kgolagano e Ntsha ka Segerika (e le temee e neng e tlwaelesegile ka nako e o) di tlhohlheleditswe ke Modimo, e bile di ne tsa babalelwa di le phepa mo dingwagangwageng tse di fetileng ka tlhokomelo ya gagwe. Ka jalo di tlhomame, mo e leng gore ke tsone baatlhodi ba bofelo mo dikgannyeng tsotlhe tsa kereke. Mme ka gore diteme tse ga di itsiwe ke batho botlhe ba Modimo, ba ba nang le tshwanelo le kgatlhego (e bile ba ka tswelwa ke mosola) mo Dikwalong, le ba ba laoletsweng mo poifong Modimo go di bala le go di hukutsa. Ka jalo di tshwanetse go ranolelwa mo temeng e e itsegeng ya tshaba nngwe le nngwe e di tlang mo go yone, gore (le Lefoko la Modimo le nna mo go botlhe ka mahumo otlhe) batho botlhe ba obamele Modimo ka mokgwa o o amogelesegang, gape le ka bopelotelele le kgomotso ya Dikwalo ba nne le tsholofelo.
Bar 3:2 Isa 8:20 Ditiro 15:15 Joh 5:39 1 Bakor 14:6, 9, 11, 12, 24, 28 Bakor 3:16
9. Molao o o senang selabe wa go ranola Dikwalo ke o o reng Baebele e a ithanola. Ka jalo, fa go na le potso nngwe ka boammaruri le botlalo jwa tshetla nngwe ya Dikwalo (e e gantsi, e se nngwe fela), e tshwanetse ya tlhologannngwa ka fa leseding la dikarolo tse dingwe tse di buang ka thamalalo.
2 Pet 1:20 Ditiro 15:15,16
10. Moatlhodi mogolo o o fetšang dikgang tsotlhe tsa tumelo, le yo ditshwetso tsotlhe tsa makgotla, maikutlo a bakwadi ba bogologolo, le dithuto tsa batho le boramaboko di tshwanetseng go kanokwa ka tsone, ga e ka ke ya nna sepe kwa ntle ga Dikwalo tse di Boitshepo tse di neilweng ke Mowa. Tumelo ya rona e tlhomamisiwa ke katlholo ya Baebele.
Math 22:29,31 Baef 2:20 Ditiro 28:23

KGAOLO 2

MODIMO LE BORARO JO BO BOITSHEPO

1. Morena Modimo wa rona ke ene Modimo a le mongwe fela yo o tshelang wa boammaruri. Botshelo jwa gagwe bo mo go ene e bile ke jwa gagwe, ga a na tshimologo le fa e le bokhutlo mo boleng le botlalo jwa gagwe. Boleng jwa gagwe ga bo ka ke jwa ope kwa ntle gagwe. Ke mowa o o phepa go feletse, ga a bonale, ga a na mmele, dikarolo kgotsa dikeletso. Ke ene fela yo o sa sweng, o tshela mo leseding le go senang ope yo o ka le atamelang. Ga a fetoge, o mogolo, o ntse ka bosakhutleng, ga tlhologayesege, o mogolo, ga a selakanyo ka ditsela tsotlhe, o boitshepo go feletse, o botlhale jo bo senang selabe, o gololesegile go feletse, ke ene phelelo ya phelelo. O di ra dilo tsotlhe ka kgakololong ya gagwe e e sa fetogeng ya tshiamo e feletsng go isa kgalaletsong kwa go ene. O lorato lo lo feletseng, o tshwarela, mautlwelobotlhoko, pelotelele, o tletse tshiao le boammaruri; o itshwarela boikepo, ditlolo le bolelo. Ke ene moduedi wa ba ba mmailng ka tlhoafalo, mme le fa go ntse jalo o tshiamo le bogale mo dikattholong tsa gagwe, o ila bolelo, e bile ga a ka ke a phimola bolelo jwa baleofi ka gope.
1 Bakor 8:4,6 Dute 6:4 Jer 10:10 Isa 28:12 Ekes 3:14 Joh 2:24 1 Tim 1:17 Dite 4:14,16 Mal 3:6 1 Dikg 8:27 Jer 23:23 Dip 90:2 Gen 17:1 Isa 6:3 Dip 115:3 Isa

2. Modimo o na le botshelo jotlhe, tshiamo, tshegofatso ya gagwe mo go ene; ga a tshwane le ope mo boleng jwa gagwe, o feletse mo go ene ga a tlhale sepe, ga a tlhoke sepe mo ditshiding dipe tse o di dirileng e bile ga tseye kgalalelo epe mo tsone, mme tota ke ene a supang kgalalelo ya gagwe mo go tsone, ka tsone, fa pele ga tsone le fa godimo ga tsone. Ene ka esi ke motswedi botshelo jotlhe, dilo tsothe di tswa mo go ene, di tlile ka ene, di ya kwa go ene. O okametse dibopiwa tsothe ka puso ya bogolo, go dira ka tsone, go di direla, le go di dirisa ka fa a ratang. Mo ponong ya gagwe dilo tsothe di bulegile di papametse, kitso ya gagwe ga e na phelelo, ga e na phoso, ga e a ikaega ka sebopiwa sepe, ka jalo mo go ene ga gona sepe se se fitlhegileng kgotsa se se sa tlhologanyesegeng. O boitshepo jo bo feletseng mo mananeong othe a gagwe, mo ditirong tsothe tsa gagwe, le ditaolong tsothe tsa gagwe. Baengele le batho, jaaka dibopiwa, ene e le Mmopi, ba tshwanetse go mo obamela, go mo direla le go mo utlwa, le go dira sepe fela se a se lopang mo go bone. Joh 5:26 Dip 148:13 Dip 119:68 Job 22:2,3 Bar 11:34-36 Dan 4:25,34,35 Bah 4:13 Esek 11:5 Ditiro 15:18 Dip 145:17 Tsh 5:12-14

3. Mo boleng jwa semodimo jo bo senang phelelo go na le boraro, Rara, Morwa (kgotsa Lefoko) le Mowa o o Boitshepo. Ba bangwe ka boleng, nonofo, le bosaengkae, mongwe le mongwe a na le boleng jwa semodimo, mme boleng jo ga bo a kgaogana.

Rara ga a tswa mo go ope, ga a tsalwa kgotsa go tswa; Morwa o tsetswe ka bosaengkae ke Rara; Mowa o o Boitshepo o tswa mo Rara le Morwa. Boraro jo ga bona tshimologo le fa e le bokhutlo, mme ka jalo ke Modimo o le mongwe fela, o o sa kgaogangwe ka tlholego le boleng. Le fa go ntse jalo ba farologangwa ke dintlha dingwe le tirisanyo mmogo.

Thuto ya Boraro ke motheo wa botsalano jotlhe le Modimo, le kgomotso ya go ikaega ka ene ga rona.

1 Joh 5:7 Math 28:19 2 Bakor 13:14 Ekes 3:14 Joh 14:11 1 Bakor 8:6 Joh 1:14,18 Joh 15:26 Bag 4:6

KGAOLO 3 DITAOLO TSA MODIMO

1. Modimo o laotse dilo tsothe tse di diragalang, mme se o se dirile mo go ene go tswa ka bosaengkae, ka kgakololo ya go rata ga gagwe e e boitshepo le botlhale jo bo tletseng, e e gololesegileng e e sa fetogeng.

Mme se o se dirile ka tsela e e leng gore ga e dire Modimo motlhodi wa bolelo, e bile ga a abelane le ope mo boleong, e bile se ga se senye go rata ga sebopiwa ka gope, kgotsa go tsaya kgololesega ya go dira le mabaka a mangwe a dirang gore dilo di diragale fa e se go a tlhomamisa.

Mo dilong tse tsothe, botlhale jwa Modimo bo supiwa mo go laoleng dilo tsothe, jaaka e le nonofo le boikanyego jwa gagwe mo go diragatseng

taolo ya gagwe.

Isa 46:10 Baef 1:11 Bah 6:17 Bar 9:15,18 Jak 1:13 1 Joh 1:5 Ditiro 4:27,28 Joh 19:11 Dipal 23:19 Baef 1:3-5

2. Le fa ntswa Modimo o itse dilo tsothe tse di ka diragalang kgotsa tse di tla diragalang mo diemong tsothe tse di ka akanngwang, ga a laolela sepe ka gore o se bonetsepele mo isagong, kana ka gore se tla diragala ka mabaka mangwe a a rileng.
Ditiro 15:18 Bar 9:11,13,16,18

3. Ka taolo ya Modimo, go supa kgalalelo ya gagwe, batho le baengele bangwe ba laoletswe go ya botshelong jo bo sa khutleng mo go Jesu Keresete, go galaletsa tshegofatso ya gagwe e e galalelang. Ba bangwe ba tlogetse go tswela mo boleong jwa bone go ya kwa katlholong ya tshiamo, go isa kgalalello kwa katlholong ya tshiamo ya gagwe.
1 Tim 5:21 Math 25:34 Baef 1:5,6 Bar 9, 22,23 Jut 4

4. Baengele le batho ba ba laolelsweng botshelo jo sa khutleng ba tlhomamisitse ka tsela e e leng palo ya bone ga e kake ya okediwa kgotsa go fokodiwa.
2 Tim 2:19 Joh 13:18

5. Modimo o tlhophile batho bao ba ba laolelsweng botshelo pele ga motheo wa lefatshe, go tsamaelana le maikaelelo a gagwe a bosaengkae a sa fetogeng, le kgakololo ya sephiri le boitumelo jwa bontle jwa thato ya gagwe. Modimo o ba tlhophetse kgalalelo ya bosakhutleng mo go Keresete go tswa fela mo tshegofatsong ya gagwe e e gololesegileng le lorato lwa gagwe, go sena sepe mo sebopiweng se e leng sone lebaka le le dirileng gore a se tlhophe.
Baef 1:4,9,11 Bar 8:30 2 Tim 1:9 1 Bath 5:9 Bar 9:13,16 Baef 2;5,12

6. Fela jaaka Modimo a laoletse baitshenkedwi go ya kgalalelong, o bile ka bosakhutleng le ka maikaelelo a gagwe a a gololesegileng o beile go sa le pele ditsela tsothe tsa gore go kgonagale. Ka jalo ba ba itshenketse (e le ba ba oleng mo go Atame) ba rekolotse mo go Keresete, ba bileditswe mo tumelong mo go Keresete, ka Mowa o dira ka motlha o o siameng, ba a siamisiwa, ba fiwa bongwana, ba a ntlafadiwa, le go tshagediwa ke nonofo gagwe ka tumelo mo polokong. Ga gona ope kwa ntle ga baitshenkedwi yo rekololwang, a bidiwa, a siamisiwa, a fiwa bongwana, a ntlafadiwa, a ba a bolokwa.
1 Pet 1:2 2 Bath 2:13 1 Bath 5:9,10 Bar 8:30 2 Bath 2:13 1 Pet 1:5 Joh 10:26; 17:9; 6:64

7. Thuto e ya masaitseweng a a kwa godimo a go laolelwa e tshwanetse ya tshwarwa ka kelothoko e e haphegileng le thloafalo, gore e tle e re ba ba utlwang go rata ga Modimo mo go senotsweng mo Lefokong la gagwe, le ba ba le tshetsang, ba rurifalediwe go itshenkelwa ga bone ga bosaengkae go tswa mo tlhomamong ya pitso ya bone. Jalo he thuto e e tla kgothatsa kgalalello, tlotlo le lorato mo Modimong, le go kgothatsa boingotlo, le thloafalo a bo e tliša kgomotso e kgolo mo go botlhe ba ba amogelang Efangele ka boammaaruri.

KGAOLO 4 LOBOPO

1. Mo tshimologong go kgathlile Modimo Rara, Morwa, le Mowa o o Boitshepo, go tlhola lefatshe le dilo tsotlhe tse di mo go lone, tse di bonalang le tse di sa bonaleng, mo malatsing a le marataro e bile gotlhe go ne go siame. Mo e ne e le sesupo sa kgalalelo ya nonofo ya bosakhutleng, botlhale le tshiamo ya gagwe.
Joh 1:2,3 Bah 1:2 Job 26:13 Bar 1:20 Bakol 1:16 Gen 1:31
2. Morago ga Modimo a dira ditshidi tsotlhe, o ne tlhola batho, nona le tshadi, ba na le tlhaloganyo le mewa e e sa sweng, a ba dira gore ba kgone go tshela botshelo jo Modimo a bo ba tlholetseng. Ba ne ba dirwa mo setshwanong sa Modimo, ba na le kitso, tshiamo, le boitshepo jwa boammaaruri. Ba ne ba le molao wa Modimo o kwadilwe mo dipelong tsa bone, le nonofo ya go o diragatsa; le fa ba ne ba na le bokgoni jwa go o tlola, mme ba ne ba tlogelwa mo kgololesegong yaga rata ga bone mo go neng go na le go fetoga.
Gen 1:27 Gen 2:7 Moreri 7:29 Gen 1:26 Bar 2:14,15 Gen 3:6
3. Kwa ntle ga molao o o neng o kwadilwe mo dipelong tsa bone, ba ne ba amogela taolo ya gore ba se kea ba a ja *loungo* lwa setlhare sa kitso ya molemo le bosula. Fa ba tshegeditse taolo e ba ne ba itumetse mo bokopanong le Modimo, e bile ba na le taolo mo godimo ga dibopiwa tsotlhe.
Gen 2:17 Gen 1:26,28

KGAOLO 5 TLHOKOMELO

1. Modimo, Motlhodi yo o siameng wa dilo tsotlhe, mo nonofong ya gagwe e e senang selekanyo, le botlhale jwa gagwe, o a tshgetsatsa, o a kaela, a tsamaisa, a laola ditshidi le dilo tsotlhe, go tswa ka tse dikgolo go fitlha ka tse di potlana, ka tlhokomelo ya gagwe e e botlhale jo senang selabe, e e boitshepo, go isa kwa mabakeng a a di bopetseng ne. O laola go ya ka fa kitsetsopeleng ya gagwe e e senang bogole le kgakololo e e gololesegileng e e sa fetogeng ya go rata ga gagwe, go galaletsa kgalalelo ya botlhale, nonofo, tshiamo, tshiamo e e senang selekanyo, le mautlwelobothoko a gagwe.
Bah 1:3 Job 38:11 Isa 46:10,11 Dip 135:6 Math 10:29-31 Baef 1:11
2. Le fa ka fa kitsongpele le taolo ya Modimo yo e leng ene modiri wa ntlha, dilo tsotlhe di diragala ka bosafetogeng le bosenangphoso, gore go se ka ga nna le sepe se se diragalang ka phosego, kgotsa kwa ntle ga tlhokomelo ya gagwe. Mme fela ka tlhokomelo ya gagwe o di laolela gore di diragale go ya ka fa modiring wa bobedi, e ka tswa go tlhokofala, ka kgololesego, kgotsa ka pateletso.
Ditiro 2:23 Diane 16:33 Gen 8:22

3. Modimo mo tlhokomelong ya gagwe e e tlwaelesegileng o dirisa didirisiwa, le mororo a gololesegile go dira kwa ntle, kwa godimo, le kgathlanong le tsone go ya ka fa kgathlegong ya gagwe.
Ditiro 27:31,34 Isa 55:10,11 Hos 1:7 Bar 4:19,21 Dan 3:27
4. Nonofo e kgolo, botlhale jo bo sa phuruphutshiweng, le tshiamo e e se nang phelelo ya Modimo, e supa tlhokomelo ya gagwe thata, mo e le gore maikaelelo a bogolo jwa gagwe a fitlhelela le kwa go weng ga ntlha le ditiro tse dingwe tsa boleotsa baengele le batho. Mo ga go diragale ka tseletso fela, ka gore o kganela ka botlhale le nonofo e kgolo le ka ditsela tse dingwe o tsamaisa a ba laola ditiro tsa bolelo, gore di tle di diragatsa maikaelelo a gagwe a a boitshepo. Le fa go ntse jaloboleo jwa ditiro tseo bo tswa mo sebopiwigeng gotlhelele. E seng mo Modimong, yo ka boene a leng boitshepo le tshiamo; ga a ka ke a ba a nna mosimolodi kgotsa morotloetsi wa bolelo.
Bar 11:32-34 2 Sam 24:1 1 Ditirah 21:1 2 Dikg 19:28 Dip 76:10 Gen 50:20 Isa 10:6,7,12 Dip 50:21 1 Joh 2:16
5. Modimo, o o botlhale thata, le tshiamo, le letlotlo la tshagofatso ka dinako tse dintsi o a tle tlogele [le] bana ba gagwe mo dithaelong tse di mefuta, le mo tlhakathakanong ya dipelo tsa bone. Odira se go ba otlhaela maleo a bone a nako e e fetileng, kgotsa go ba kaela nonofo e e fitlhegileng ya sebedu le boferefere jo bo sa ntseng bo le mo dipelong tsa bone gore ba tle ba kokobediwe, go ba tlisa mo go ikaeng ka ene ka dinako tsotlhe le gore ba nne gauifi le ene, le go dira gore ba itise thata kgathlanong le bolelo mo isagong, le mo mabakeng a a faroganeng le a a boitshepo. Ka jalo sengwe fela se se se ka diragalelang mongwe wa baitshenkedwi se diragala ka taolo ya gagwe, go isa kgalaletsong kwa go ene le tshiamo mo go bone.
2 Ditira 32:25,26,31 2 Bakor 12:7-9 Bar 8:28
6. Fa e le batho ba bosula le ba ba boikepo ba Modimo jaaka moatlhodi o o siameng o a ba fofatsa a bo a ba kgwaralatsa ka ntlha ya maleo a bone, ga se fela gore a bo a sa ba neele tshagofatso ya gagwe e ka yone ba sedimosediwang mo go tlhaloganyeng ga bone ba bo ba amega mo dipelong tsa bone, mme dinako tse dingwe o ba a tsaya le dimpho tse ba neng ba na natso, a bo a ba a ba neela mo diemong tse tshenyego ya bone e di dirang monyetla wa bolelo. Godimo ga moo, Modimo o ba neela mo dikeletsong tsa bone, dithaelo tsa lefatshe, le nonofo ya ga Saatane, gore e tle kwa bofelong ba ikgwaralatse ka tsone dilo tse Modimo a di dirasang go tlhogofatsa ba bangwe.
Bar 1:24-26,28; 11:7,8 Dut 29:4 Math 13:12 Dut 2:30 2 Dikg 8:12,13 Dip 81:11,12 2 Bath 2:10-12 Ekas 8:15,32 Isa 6:9-10 1 Pet 2:7,8
7. Jaaka tlhokomelo ya Modimo e fitlhelela ka tsela e e atlameng mo dibopiwigeng tsotlhe, mme, ka tsela e e haphegileng e disa kereke ya gagwe e bo e laola dilo tsotlhe go siamela kereke.
1 Tim 4:10 Amos 9:8,9 Isa 43:3-5

KGAOLO 6
GO WA, BOLEO LE KATLHOLO YA JONE

1. Modimo o tlhodile Atame a tlhamaletse a se na selabe, a mo neela molao wa tshiamo o o neng o sireletsa o ba o tshetsa botshelo jwa gagwe, mme o mo sholofetsa loso fa a ka o roba. Le fa go ntse Atame ga a a tshela ka lobaka mo seemong se sa tlotlo. Saatane o dirisitse maretshwa a noga go fenya Efa, ene a tsietsa Atame, mme Atame (kwa ntle ga pateletso epe) ka bomo a tlola molao wa lobopo lwa bone le taelo e ba neng ba e neilwe ka go ja loungo lo ba ileditsweng go lo ja. Go kgatlhile Modimo go letlelela tiragalo, go ya ka fa kgakololong ya gagwe e e botlhale le boitshepo, jaaka e neng e le maikalelelo a gagwe go e laolela kwa kgalalelong ya gagwe.
Gen 2:16,17 Gen 3:12,13 2 Bakor11:3
2. Ka boleo jo batsadi ba rona ba ntlha ba wa mo seemong sa bone sa pele sa tshiamo le bokopano le Modimo. Re ole mo go bone, ka gore ka jone (boleo)loso lo tlile go botlhe; botlhe ba a swa mo boleong ba bo ba senngwa gotlhelele mo dintheng le dikarolong tsa mewa le mebele ya bone.
Bar 3:23 Bar 5:12 Tit 1:15 Gen 6:5 Jer 17:9 Bar 3:10-19
3. Ka taolo ya Modimo, ya nna bone modi, ba eme boemong jwa lotso lotlhe lwa setho. Molato wa boleo wa fetisediwa, le tlhologo e e bosula ya bone ya fetisediwa mo losikeng lwa bone ka go tsalwa ga tlhologo. Dikokomane tsa bone ka jalo di bopelwa mo sebeng, mme ka tlhologo ke bana ba tshakgalo, batlhanka ba boleo, ba ba lebanweng ka loso le matlhotlhapelo a mangwe-a semowa, ka nakwana, le ka bosakhutleng- kwa ntle ga fa Morena Jesu a ba golola.
Bar 5:12-19 1 Bakor 15:21,22,45,49 Dip 51:5 Job 14:4 Baef 2:3 Bar 6:20; 5:12 Bah 2:14,15 1 Bathes 1:10
4. Ditlolo tsothe tse di dirwang di tswa mo mo tshenyegong e ya tshimologo. Ka yone gotlhelele ga re kgone e bile re golafetse, re eme kgatlanong le tshiamo yotlhe mme re gogele kwa tshiamololong.
Bar 8:7 Bakor 1:21 Jakobe 1:14 Math 15:19
5. Mo botshelong jo, tshenyego e e nna mo go ba ba sa ntshafadiwang. Le fa ntswa e itshwarelwa e bo e bolawa mo go Keresete, mme tota tlhologo e ya tshenyego le ditiro tsothe tsa yone ke boleo.
Bar 7:18,23 Moreri 7:20 1 Joh 1:8 Bar 7:23-25 Bagal 5:17

KGAOLO 7
KGOLAGANO YA MODIMO LE MOTHO

1. Sekgala se se fa gare ga Modimo sebopiwa se segolo thata mo e leng gore (le fa dibopiwa tse di nang le tlhologanyo di tshwanelwa ke go mo obamela jaaka Mmopi) di ka se ke di bone tuelo ya botshelo kwa ntle ga tiro ya boithaopo ya go ikokobetsa mo lethakoreng la Modimo. Se o kgatlhegile go se supa ka tsela ya kgolagano.
Luk 17:10 Job 35:7,8

2. Kwa godimo ga mo o, ka ntlha ya gore Atame a itlisetse le losika lwa gagwe ka fa tlase ga phutso ya molao ka go wa gagwe, ga kgatlha Morena go dira kgolano ya tshhegofatso. Mo kgolaganong e o fa baleofi botshelo le poloko mo go Jesu Keresete go sena tuelo, a batla go tswa mo go bone tumelo mo go ene gore ba tle ba bolokwe, a ba solofetsa go abeela botlhe ba ba tlhophetsweng botshelo jo bo sa khutleng Mowa o o Boitshepo, go dira gore ba batle a bo ba go dumela.
Gen 2:17 Bagal 3:10 Bar 3:20,21 Bar 8:3 Mar 16:15,16 Joh 3:16 Esek 36:26,27 Joh 6:44,45 Dip 110:3
3. Kgolagano e senolwa ka Efangele; la ntlha mo go Atame mo tsholofetsong ya poloko ka peo ya mosadi, morago ga moo kgato le kgato go fithelela tshenolelo e e tletseng ya yone e felelediwa mo Kgolaganong e Ntsha. Poloko e e ikaegile mo go yone kgolagano e o ya bosakhutleng e e fa gare ga Rara le Morwa mabapi le thekololo ya baitshenkedwi. Ke ka tshhegofatso fela ya kgolagano e e leng gore mongwe le mongwe wa losika lotlhe lwa ga Atame yo o bolokwang a bonang botshelo le go tshela ruri mo gotshegofatsong. Batho botlhe jaanong ga ba kgone go bona kamogelo mo Modimong ka mabaka a Atame a neng a eme ka one mo seemong sa gagwe sa botlhokamolato.
Gen 3:15 Bah 1:1 2 Tim 1:9 Tit 1:2 Bah 11:6,13 Bar 4:1,2 Ditiro 4:12 Joh 8:56

KGAOLO 8
KERESETE MOLETLANYI

1. Ga kgatlha Modimo, mo maikaelelong a gagwe a bosakhutleng, go tlhophela go laolela Morena Jesu, Morwaagwe yo o esi, ga ya ka fa kgolaganong e e dirilweng fa gare ga bone boobabedi, gore a nne Moletlanyi fa gare ga Modimo le losika lwa motho; go nna moporofiti, moperesiti, le kgosi; go nna tlhogo le Mmoloki wa kereke ya gagwe, mojaboswa wa dilo tsothe, moatlhodi wa lefatshe. Go tswa bosaeengkae o mo neetse batho gore ba nne dikokomane tsa gagwe. Mo motlheng o o tshwanetseng ba ba tla a rekololwa, ba bidiwa, ba siamisiwa, ba ntlafadiwa, ba bo ba galediwa ke ene.
Isa 42:1 1 Pet 1:19,20 Ditiro 3:22 Bah 5:5,6 Dip 2:6 Luk 1:33 Baef 1:22,23 Bah 1:2 Ditiro 17:31 Isa 53:10 Joh 17:6 Bar 8:30
2. Morwa Modimo, motho wa bobedi wa Boraro jo bo Boitshepo, ke Modimo ka boammaaruri. Ke phatsimo ya kgalalelo ya ga Rara, wa boleng jo bongwe le Rara e bile o lekana le ene yo o thodileng lefatshe, yo o tshhegeditse, le go laola dilo tsothe tse o di dirileng.

E rile fa botlalo jwa nako bo tlile, a tsaya setshwano sa motho, le tsothe tsa setho le makowa a setho, mme kwa ntleng ga boleo. O ne a imiwa ke Mowa oo Boitshepo mo sebopelelong sa leggarejwana Marea. Mowa o o Boitshepo o ne wa fologela mo go ene mme nonofo ya Mogodimodimo ya mo tshutifalela, gore a tsalwe ke mosadi wa lotso lwa Juta, kokomane ya ga Aberehame le Dafite, go ya ka fa dikwalong.

Ka jalo boleng jo bo bobedi, jo bo farologanyeng bo ne jwa kopangwa mo mothong yo mongwe fela, go sena phetogo, tlhakano, kgotsa ketsaetsego. Jalo he motho yo ke Modimo ka sebele e bile ke motho tota, mme a ntse e le Keresete yo mongwe fela, moletlanyi yo o esi fa gare ga Modimo le losika lwa motho.

Joh 1:14 Bagal 4:4 Bar 8:3 Bah 2:14,16,17: 4:15 Math 1:22,23 Luk 1:27,31,35 Bar 9:5 1 Tim 2:5

3. Morena Jesu, boleng jwa gagwe jwa setho bo kopantswe jalo le jwa semodimo mo go Morwa, o ne a farologangwa le ke go tloদিwa ke Mowa o o Boitshupo go se na selekanyo, gore mo go ene go nne mahumo otlhe a bothale le kitso. Go kgatlhile Rara gore botlalo jotlhe bo nne mo go ene, gore ka a le boitshupo, a se diphatsa, a sa kgotlelwa ke sepe, a tletse tshogofatso le boammaarui, a kgone go diragatsa tiro ya boletlanyi le ya boemedi ka botlalo. Ga a ka a itsubulela maikarabela a, mme o bileditswe mo go one ke Rara, yo gape o beileng nonofo yotlhe ya boatlhodi mo mabogong a gagwe, a bo a mo laolela gore a diragatswe tse.
Dip 45:7 Ditiro 10:38 Joh 3:34 Bakol 2:3 Bakol 1:19 Bah 7:26 Joh 1:14 Bah 7:22 Bah 5:5 Joh 5:22,27 Math 28:18 Ditiro 2:36
4. Morena Jesu o tsera maikarabelo a ka go rata. O a diragaditse a le ka fa tlase ga taolo ya molao a ba a diratsa ka botlalo. Gape o ne a welwa ke kotlhae e e neng e re lebanye e re neng re tshwanetswe ke gore re tlhokofadiwe ka yone. O ne a dirwa bolele a ba hutsediwa rona, o ne a welwa tlhokofatso e e senang selekanyomo moweng wa gagwe le tshotlego mo mmeleng wa gagwe. O ne a bapolwa, a swa, a nna mo seemong sa loso, mme mmele wa gagwe wa seka wa bola. Mo letsatsing la boraro a tsoga bo baswing ka one mmele o a neng a sotlegile a le mo go one, o ka one a tlhatlogetseng kwa legodimong, kwa a ntseng ka fa letsogong le legolo la ga Rara a rapelela [batho ba gagwe]. Kwa bokhutlong jwa lefatshe o tla boela go athola batho le baengele.
Dip 40:7,8 Bah 10:5-10 Joh 10:18 Bagal 4:4 Math 3:15 Bagal 3:13 Isa 53:6 1 Pet 3:18 2 Bakor 5:21 Math 26:37,38 Luke 22:44 Math 27:46 Ditiro 13:37 1 Bakor 15:3,4 Joh 20:25,27 Mareko 16:19 Ditiro 1:9-11 Bar 8:34 Bah 9:24 Ditiro 10:42 Bar 14:9,10 Ditiro 1:11 2 Pet 2:4
5. Morena Jesu o kgotsofaditse tshiamo ya Modimo ka botlalo ka kutloya gagwe e e tletseng le sethabelo sa gagwe sa bofelo se a se diretseng Modimo ka Mowa wa bosakhutleng. O tlisitse tsereganyo, o reketse botlhe ba Rara a ba mo neileng bojaboswa jwa bonakhutleng mo bogosing jwa legodimo.
Bah 9:14; 10:14 Bar 3:25,26 Joh 17:2 Bah 9:15
6. Le fa ntswa thekololo e sa duelwa ke Keresete go fitlhelela morago ga a tsaya setshwano sa motho, mme tota tlhwatlhwa ya yone, bokgoni, le maduo a yone a ne a abelwa baitshenkedwi mo dingwageng tsoitlhe go tswa tshimologong ya lefatshe. Mo go ne ga diragadiwa ka ditsholofetso, ditshwantsho, le ditlhabelo tse ka tsone o neng a senolwa jaaka peo ya mosadi e e tshwanetseng go tapeta tlhogo ya noga, le kwana e e tlhahlweng go tswa tshimologong ya lefatshe, ka gore e ntse ke ene wa maabane, gompiano le ka bosakhutleng.
1 Bakor 4:10 Bah 4:2 1 Pet 1:10,11 Tshen 13:8 Bah 13:8

7. Mo tironng ya gagwe ya boletlanyi, Keresete o dira ka fa ditlhologong tsa gagwe tse pedi, mo tlhologong a dira se se e lebanyeng. Le fa go ntse jalo, ka ntsha ya bongwe fela jwa boleng jwa gagwe, se se lebanyeng tlhologo e nngwe nako tse dingwe mo Dikwalong se kaiwa fa se dirilwe ke motho yo o supiwang ke tlhologo e nngwe.
Joh 3:13 Ditiro 20:28
8. Mo go botlhe ba Keresete a ba bonetseng thekololo ya bosakhutleng, ka botlalo le tlhomamo le itemogelo o ba neela thekololo e, a ba rapelela. O ba kopanya le ene ka Mowa, o ba senolela masaitseweng a poloko mo Lefokong le ka Lefoko, o ba rotloetsa go dumela le utlwa a laola dipelo tsa bone ka lefoko la gagwe le ka Mowa, a ba a fenya baba botlhe ba bone ka nonofo ya gagwe e kgolole bothale a dirisa methale le ditsela tsela tse di tsamelanang le tlhokomelo ya gagwe e e gakgamatsang e e senang go hukutsiwa. Tse tsoitlhe di dirwa ka tshogofatso e e gololesegileng, go sena mabaka ape a a bonetswengpele a a dirang gore ba tshwanelwe ke yone.
Joh 6:37; 10:15,16; 17:9 Bar 5:10 Joh 17:6 Baef 1:9 1 Joh 5:20 Bar 8:9,14 Dip 110:1 1 Bakor 15:25,26 Joh 3:8 Baef 1:8
9. Maikarabelo a Moletlanyi fa gare ga Modimo le losika lwa setho ke a ga Keresete a le nosi. Yo o leng Moporofiti, Moperesiti, le Kgosi ya Kereke ya Modimo. Maikarabelo a a ka se ke a fetesediwe go tswa mo go ene go ya kwa go ope, ka sephatlo kgotsa otlhe.
1 Tim 2:5
10. Palo le tatelano ya maikarabelo a e botlhokwa. Ka ntsha ya bosenakitso jwa rona re tlhoka moporofiti. Ka ntsha ya kgaogano ya rona le Modimo le bogole jwa ditiro tsa rona tse dintle re tlhoka tiro e ya boperesiti gore a re letlanye a bo a re tlise fa pele ga Modimo re le ba ba amogelesegang. Ka ntsha ya bogantsi jwa rona le go palelwa ke go boela kwa Modimong, le ka ntsha ya gore re tlhokana le falosiwa le sirelediwa mo babeng ba rona ba semowa, re tlhoka kgosi gore e thuse go tlhaloganya, e re fenyetse, e re gogele, e retshegeletse, e re gololele, le gore babalelela bogosi jwa gagwe jwa legodimo.
Joh 1:18 Bakol 1:21 Bagal 5:17 Joh 16:8 Dip 110:3 Luke 1:74,75

KGALOLO 9 THATO E E GOLOLESEGELENG

1. Modimo o neile thato ya motho ka tlhologo kgololesego le nonofo ya go dira ka boitlhophelo; ga e patelediwe, le fa e le go patikiwa ke sepe go dira tshiamo kgotsa bosula.
Math 17:12 Jak 1:14 Dut 30:19
2. Mo seemong sa gagwe sa botlhokaboleo, Atame o ne a na le kgololesego le nonofo ya go dira se se neng se siame se kgatlha Modimo, mme o ne a sa tlhomama sentle mo go neng go dira gore a kgone go wa mo seemong se.
Mor 7:29 Gen 3:6
3. Losika lwa motho ka ga wela mo seemong sa bolele, lo latlhegetswe ke bokgoni jotlhe jwa go dira tshiamo epe ya semowa e e tsiang poloko. Mo

seemong sa rona sa tlholego re ganana le tshiamo yotlhhe ya semowa re bile re sule mo boleung, ga re kgone, ka thata ya rona, go itshokolola, le fa e le ipaakanyetsa tshokologo.

Bar 5:6; 8:7 Baef 2:1,5 Tit 3:3-5 Joh 6:44

4. Fa Modimo a sokolola baleofi a bo a ba fetolela mo seemong sa tshhegofatso, o ba golola mo botshwarong jwa bone jwa tlholego mo boleung, mme ka tshhegofatso ya gagwe e le yosi o ba kgontsha ka kgololesego go rata le go dira tshiamo mo semoweng. Le ga ntse jalo, ka ntlha ya go nna mo tshenyegong, ga ba kgone gotlhelele go rata se se siameng ka dinako tsotlhe, mme gape ba eletsa bosula.

Bakol 1:13 Joh 8:36 Bafil 2:13 Bar 7:15,18,19,21,23

5. Ke fela mo seemong sa kgalalelo mo gorata ga rona go tla fiwang kgololesego e e feletseng ya go eletsa tshiamo fela.

Baef 4:13

KGAOLO 10 PITSO

1. Bao ba Modimo a ba laoletseng botshelo, o itumelela (mo nakong ya gagwe e e beilweng e e siameng) go ba biletsa polokong ka Lefoko le ka Mowa. O ba bitsa go tswa mo seemong sa bolelo le loso se ba leng mo go sone ka tlholego, go tsena mo tshhegofatsong le polokong ya ga Jesu Keresete. O sedimosa ditlhaloganyo tsa bone semowa le ka polokosego go tlhaloganyo dilo tsa Modimo. O ntsha peloya bone ya lentswe, o ba fa pelo ya nama. O swafatsa dikeletso tsa bone, e bile ka nonofo ya gagwe e kgolo o dira gore ba dira tshiamo. O ba gogela mo go Jesu Keresete, e ntswa a dira seo ka tsela e e leng gore ba tla ba gololesegile, ka ntlha ya gore tshhegofatso ya gagwe e dira gore ba eltse go tla.

Bar 8:30; 11:7 Baef 1:10,11 2 Bathes 2:13,14 Baef 2:1-6 Ditiro 26:18 Baef 1:17,18 Esek 36:26 Dut 30:6 Esek 36:27 Baef 1:19 Dip 110:3 Cant. 1:4

2. Piletso polokong e ke ya tshhegofatso ya Modimo e e gololesegileng e e haphegileng fela, e seng ka ntlha ya sengwe se se bonweng mo go rona go sa le pele. Ga e dirwe ka mabaka a nonofo kgotsa kgato epe mo go rona, ka ntlha ya gore ga re na seabe sepe mo go yone, re sule mo boleong le mo ditlong tsa rona go fitlhelela rudisiwa re ba re ntshwafadiwa ke Mowa o o Boitshepo. Ka [tsalo seshwa] e re kgontshiwa go tsibogela pitso e, le go amogela tshhegofatso e e fiwang e tla ka yone. Nonofo e ga se epe kwa ntle ga e e sositseng Keresete mo baswing.

2 Tim 1:9 Baef 2:8 1 Bakor 2:14 Baef 2:5 Joh 5:25 Baef 1:19,20

3. Masea [WC Masea a a itshenketsweng] a a swang mo bonyennyaneng a tshafadiwa a ba a bolokwa ke Keresete ka Mowa yo o dira ka nako nngwe le nngwe le gongwe le gongwe le ka mokgwa mongwe le mongwe o o mo kgatlang. Gape baitshenkedwi botlhe ba tsalwa sesa ba ba sa kgoneng go bidiwa ka bodiredi jwa lefoko.

Joh 3:3,5,6 Joh 3:8

4. Ba ba sa itshenkelwang, le fa ba ka bidiwa ka bodiredi jwa Lefoko ba bo ba ikutlwela go dira ga Mowa mo go atlaganeletseng mongwe le mongwe, ga ba ka ke ba bolokwa ka gore ga ba biletswe mo polokong ke Rra, ka jalo ga kitla, e bile ga ba kgone go tla mo go Keresete ka boammaaruri. Le bone ba ba sa dumeleng tumelo ya Sekeresete ga ba ka ke ba bolokwa, go sa kgathalesege gore ba dira ka thata gole kae gore matshelo a bone a tsamaelane le lesedi la tlholog le dithuto tsa tumelo e ba e dumeleng.

Math 22:14; 13:20,21 Bah 6:4,5 Joh 6:44,45,65 1 Joh 2:24,25 Ditiro 4:12 Joh 4:22; 17:3

KGAOLO 11 TSHIAMISO

1. Bao ba Modimo a ba biletsang polokong o ba siamisa go se na tuelo. O dira se, a sa tsenye tshiamo mo go bone, mme ka go ba itshwarela maleo a bone, a ba balela a ba amogela fa ba siame, e se ka ntlha ya sengwe se ba se dirileng, fa e se ka lebaka la Keresete fela. Ga ba siamisiwe ka ntlha ya gore Modimo o ba balela [ke gore o a ba balela] jaaka e le tshiamo ya bone e ka tswa e le tumelo ya bone, kgotsa tiro ya go dumela, kgotsa tiro nngwe fela ya kutlo mo Efangeleng. Ba siamisiwa ka gore Modimo o ba apesa kutlo ya ga Keresete mo molaong e e tletseng le kutlo ya gagwe mo losong. Ka tumelo ba amogela ba bo ba ikhutsa mo tshiamong ya gagwe, mme tumelo e ga e tswa mo go bone, ke mpho ya Modimo.

Bar 3:24; 8:30 Bar 4:5-8 Baef 1:7 1 Bakor 1:30,31 Bar 5:17-19 Bafil 3:8,9 Baef 2:8-10 Joh 1:12 Bar 5:17

2. Tumelo e e amogelang e bo e ikaega ka Keresete ke yone fela e dirisiwang ka yosi go isa tshiamong. Mme le gale ga e nke e nna yosi mo mothong yo o siamisiwang, mme nako tsotlhe e paitwa ke ditshegofatso tse dingwe tsa poloko; ga se tumelo e e suleng, ka e dira ka lorato.

Bar 3:28 Bag 5:6 Jak 2:17,22,26

3. Ka kutlo le loso, Keresete o feditse molato otlhe wa ba ba siamisiwang. Ka setlhabelo sa madi a gagwe mo mokgorong, o tsere maemo a bone le kotlhao e e neng e ba lebanye, ka jalo a kgotsofatsa tshiamo ya Modimo ka mokgwa o o lebanyeng, o o tletseng, o o tshwanetseng mo boemong jwa bone. Le fa go ntse jalo tshiamiso ya bone e dirwa fela ka tshhegofatso go se na tuelo, ka gore Rara o mo ntsheditse bone, le ka gore kutlo le kgotsofatsa ya gagwe e amogetswe mo boemong jwa bone, ditiro tsoopedi di dirwa go se na tuelo, e se ka mabaka ape mo go bone. Ka jalo tshiamo ya Modimo e e sa foseng le mahumo a tshhegofatso ya gagwe a galalediwa mo tshiamisong ya baleofi.

Bah 10:14 1 Pet 1:18,19 Isa 53:5,6 Bar 8:32 2 Bakor 5:21 Bar 3:26 Baef 1:6,7; 2:7

4. Go tswa kwa bosaengkae Modimo o laotse go siamisa baitshenkedwi, e bile Keresete mo botlalong jwa nako o swetse maleo a bone, a ba a tsogela tshiamiso ya bone. Le fa go ntse jalo ga ba siamisiwe ka bo bone gofitlhelala Mowa o o Boitshepo ka nako e e tshwanetseng o tsisa Keresete mo dipeleng tsa bone.

Bag 3:8 1 Pet 1:2 1 Tim 2:6 Bar 4:25 Bakol 1:21,22 Tit 3:4-7

5. Modimo o tswelera a itshwarela maleo a ba ba siamisitsweng; le fa ba ka se ke ba we mo seemong sa tshiamiso, mme ba ka wela ka fa tlase ga go sa itumeleng ga serara ga Modimo ka ntlha ya maleo a bone. Mo seemong seo ga se gantsi bokopano jwa bone le Modimo bo buselediwa go fitlhelela ba ikokobetsa, ba ipolela maleo a bone, ba kopa boitshwarelo, ba ntshwafatsa tumelo ya bone ba sokologa.
Math 6:12 1 Joh1:7,9 Joh 10:28 Dip 89:31-33 Dip 32:5 Dip 51 Math 26:75
6. Tshiamiso ya badumedi ka fa tlase ga Kgolagano e Kgologolo e ne, mo dintlheng tse, e tshwana fela le tshiamiso ya badumedi mo Kgolaganong e Ntsha.
Bag 3:9 Bar 4:22-24

KGAOLO 12 GO FIWA BONGWANA

1. Modimo o neile gore, mo go le ka Morwagwe yo o esi Jesu Keresete, bothle ba ba siamisitsweng ba na le seabe mo tshhegofatsong ya go fiwa bongwana. Ka se ba balelwa le go itumelela kgolelesego le monyetla wa go nna bana ba Modimo. Ba na le leina la gagwe mo go bone, le go amogela mowa wa go fiwa bongwana. Ba na le tshwanelo ya go tsena mo setulong sa bogosi sa tshhegofatso ka bopelokgale, e bile ba kgona go lela ba re 'Abba, Rara!' Ba utlwelela bothoko, ba a babalelwa, ba a tlhokomelwa, le go otlhaiwa ke ene jaaka Rraabo, mme le fa ntse jalo ga ba ke ba latlwa, mme ba kaneletswe letsatsi la thekololo, ba ja boswa jwa ditsholofetso tsa bajaboswa jwa poloko ya bosakhutleng.
Baef 1:5 Bag 4:4,5 Joh 1:12 Bar 8:17 2 Bakor 6:18 Tsh 3:12 Bar 8:15 Bag 4:6 Baef 2:18 Dip 103:13 Dian 14:26 1 Pet 5:7 Bah 12:6 Isa 54:8,9 Dikh 3:31 Baef 4:30 Bah 1:14; 6:12

KGAOLO 13 NTLAFATSO

1. Ba ba kopantsweng le Keresete, ba bilelwa polokong ba tsalwa sesha, ba go bopiwa mo go bone pelo e ntsha le mowa o mosha ka bokgoni jwa loso lwa ga Jesu le tsogo ya gagwe. Go feta moo, ba a ntlafadiwa ka boammaruri ka tsone dilo tseo, ka Lefoko la gagwe le Mowa wa gagwe o nna mo go bone. Nonofa ya karolo nngwe le nngwe ya mmele wa bolelele e sentse, le dithato tsa jone di tswelera di koafadiwa di bo di bolawa, le ditshegofatso tse di bolokang di tswelera ka bogolo di tlisiwa mo botshelong le go nonotshiwa mo go bone gore ba dire boitshupo jwa boammaaruri jo kwa ntle ga jone go senang ope yo o ka bonang Morena.
Ditiro 20:32 Bar 6:5,6 Joh 17:17 Baef 3:16-19 1 Bath 5:21-23 Bar 6:14 Bag 5:24 Bakol 1:11 2 Bakor 7:1 Bah 12:14
2. Ntlafatso e e tsenelela mo mothong otlhe, mme e nna e sa felela mo botshelong jo. Masalela mangwe a tshenyego a nna a le teng mo ditokololong tsothe, mo go tswang ntwaga e e sa feleng e e senang seletlanyo, nama e eletsatsa se se kgathlanong le Mowa, le Mowa o batla se se kgathlanong le nama.

1 Bath 5:3 Bar 7:18,23 Bag 5:17 1 Pet 2:11

3. Mo ntsweng e, masalela a tshenyego a ka kgona ka dinako tse dingwe go ntsha tlhogo, mme ka nonofa e e fiwang ke Mowa wa ga Keresete o o ntlafatsang, ba ba tsetsweng sesha ba bona phenyo ka ntlha e nngwe. Ka jalo badumedi ba gola mo tshhegofatsong, ba ya kwa boitshhepong jo bo godileng mo poifong Modimo, ba gatlapela go ya kwa botshelong jwa selegodimo mo kutlong ya Efangele mo ditaolong tsothe tse Keresete jaka Tlhogo le Kgosi a di ba laoletseng mo Lefokong la gagwe.
Bar 7:23 Bar 6:14 Baef 4:15,16 2 Bakor 3:18; 7:1

KGAOLO 14 TUMELO E E BOLOKANG

1. Tshhegofatso ya tumelo (e ka yone baitshenkedwi ba kgontshiwang go dumela go isa polokong ya mowa ya bone) ke tiro ya Mowa wa ga Keresete mo dipelong tsa bone. Ga ntsi e tlisiwa ke thero ya Lefoko. E godisiwa e ba e nonotshiwa ke thero ya Lefoko, le ka go tsenelela kolobetso le go ja selalelo sa Morena, thapelo le mekgwa e mengwe e e laotsweng ke Modimo.
2 Bakor 4:13 Baef 2:8 Bar 10:14,17 Luk 17:5 1 Pet 2:2 Ditiro 20:22
2. Ka tumelo e, Mokeresete o dumela fa sengwe le sengwe se se senotsweng mo Lefokong se le boammaaruri ka gore ke Baebele ka taolo ya Modimo ka sebele. E bile re bona bontle jo bo gaisang mo Lefokong godimo ga dikwalo tsothe le sengwe le sengwe fela se se mo lefatshing, ka gore le supa kgalalelo ya Modimo le se a leng sone, bontle jwa ga Keresete le boleng le boikarabelo jwa ditiro tsa gagwe, le nonofa le botlalo jwa Mowa o o Boitshupo mo ditirong tsa gagwe.

Ka jalo badumedi ba kgontshiwa go tshhepa mo go bonalang boammaaruri jo ba bo dumetseng, le go tsibogela ka mekgwa o o tshwanetseng temana nngwe le nngwe ya Baebele, ba inela ka kutlo mo ditaolong, ba roroma fa pele ga ditlhagiso, ba atlarelle ditsholofetso tsa Modimo ka botshelo jo le jo bo tlang.

Mme ditiro tse dikgolo tsa tumelo e e bolokang ke tsone tse di amang Keresete- go amogela, go inela, go ikhutsa mo go ene a le esi go isa tshamisong, ntlafatsong, le botshelong jo bo sa khutleng, ka ntlha ya kgolagano ya tshhegofatso.

Ditiro 24:14 Dip 19:7-10; 119:72 2 Tim 1:2 Joh 15:14 Isa 66:2 Bah 11:13 Joh 1:12 Ditiro 16:31 Bg 2:20 Ditiro 15:11

3. Tumelo e ka farogana ka selekanyo, e ka nna bokowa kgotsa ya nonofa, mme le bokoweng jwa yone e farologanye ka mofuta le mekgwa (jaaka go ntse mo tshhegofatsong e e bolokang yotlhe) le tumelo le tshhegofatso ya badumedi ba nakwana. Ka jalo le fa e ka tlhaselwa gantsi ya koafadiwa, e nna e bona phenyo, e gola mo go ba le bantsi go fitlhelela ba bona tlhomamiso e e tletseng ka Keresete, yo e leng ene mosimolodi le mowetsi wa tumelo ya rona.
Bah 5:13,14 Math 6:30 Bar 4:19,20 2 Pet 1:1 Baef 6:16 1 Joh 5:4,5 Bah 6:11,12 Bakol 2:2 Bah 12:2

KGAOLO 15

TSHOKOLOGELO MO BOTSHELONG LE POLOKONG

1. Bangwe ba baitshenkedwi ba sokologa mo dingwageng tsa bogolo, ba setse ba tshedile ka ka lobaka mo seemong sa bone sa tlhologo se mo go sone ba neng ba direla dikeletso le dithato tse di farologanyeng. Mme Modimo o ba fa tshokologo ka go ba biletsa mo polokong.
Tit 3:2-5
2. Ga go na ope yo o dirang tshiamo a sa leofe, le bone batho ba ba itshiametseng tota ba ka wela mo maleong a magolo le go fosa [kgatthanong le Modimo] ka nonofo le boferefe jwa tshenyego e e mo go bone le nonofo ya thaelo. Ka jalo Modimo ka mautlwelobothoko a gagwe o neile kgolagano ya tshhegofatso gore e re fa badumedi ba leofa ba wa, ba buselediwe mo polokong ka boikwatlhao.
Mor 7:20 Luk 22:31,32
3. Tshokologo e e bolokang ke efangele ya tshhegofatso e ka yone re lemotshiwa masula a mantsi a maleo a rona ke Mowa o o Boitshepo. Ka tumelo mo go Keresete re a ikokobetsa ka ntlha ya maleo a rona ka khutsafalo ya semodimo, go bo ila, le go ikhutsafalela. Re rapelela boitshwarelo le nonofo ya tshhegofatso, re bo re ikaelela, re leka ka bojotle, ka [nonofo] e a newang ke Mowa, go tsamaya fa pele ga Modimo le go mo kgatlha mo dilong tsotle.
Sak 12:10 Ditiro 11:18 Esek 36:31 2 Bakor 7:11 Dip 119:6,128
4. Tshokologo e tshwanetse go tswela mo malatsing a botshelo jwa rona otlhe ka ntlha ya "mmele wa boleo" wa rona le ditiro tsa one. Ka jalo ke maikarabelo go ikwatlhalela maleo mangwe le mangwe a re a itseng ka kelotlhoko e e lemanyeng.
Luk 19:8 1 Tim 1:13,15
5. Mo kgolaganong ya tshhegofatso Modimo o neile sengwe le sengwe se se tlhokafalang go thusa badumedi go nnela ruri mo polokong, jalo he, le fa ntswa bolelo jo bonnyenye bo tshwanelwa ke kwatlhao, ga go na bolelo bope jo bogolo thata mo e leng gore bo ka isa ba ba ikwatlhayang kwa tathegong. Mo go dira gore boikwatlhao bo tshwanetse go nna bo rerwa.
Bar 6:23 Isa 1:16-18; 55:7

KGAOLO 16

DITIRO TSE DINTLE

1. Ditiro tse dintle ke fela tse Modimo a di laotseng mo Lefokong la gagwe le le boitshepo. Ditiro tse di senang tshimologo e o, tse di itirelwang ke batho fela ka ntlha ya tshesego ya bofufu kgotsa go iketsisa ga maikalelo a mantle, ga se ditiro tse dintle.
Mik 6:8 Bah 13:21 Math 15:9 Isa 29:13
2. Ditiro tse dintle tse, di dirwa mo kobamelong ya ditaolo tsa Modimo, ke maungo le bosupi jwa tumelo ya boammaaruri e e tshelang. Ka tsone badumedi ba supa malebogo a bone, nonofo ya tlhomamiso, ba kgothatsa

bakaulengwe ba bone, ba godisa ipolelo ya bone mo Efangeleng, le go didimatsa baganetsi [ba Efangele]. Jalo he ba galaletsa Modimo yo ba leng dibopiwa tsa gagwe, ba thodilwe mo go Keresete Jesu go dira ditiro tse dintle le go ungwa maungo a boitshepo a a isang botshelong jo bo sa khutleng.

Jak 2:18,22 Dip 116:12,13 1 Joh 2:3,5 2 Pet 1:5-11 Math 5:16
1 Tim 6:1 1 Pet 2:15 Bafil 1:11 Baef 2:10 Bar 6:22

3. Bokgoni jwa bone jwa go dira ditiro tse ga bo tswa mo go bone ka gope, fa e se mo Moweng wa ga Keresete fela. Go ba kgonisa go dira ditiro tse dintle (kwa ntle ga ditshegofatso tse ba setseng ba di amogetse) ba tlhokana le tshedimotsetso ya Mowa o o Boitshepo go ba gwelha go dira le go rata ka fa go kgatlhegeng ga gagwe mo go molemo. Le fa go ntse jalo se ga se a tshwanela go ba dira botlhaswa, kgotsa go akanya gore ga baa tshwanela go dira sepe go fithelela Mowa o ba gwelha ka tsela e e faphegileng; mme tota, ba tshwanetse go nn thaga mo go kgotletseng tshhegofatso ya Modimo e e mo go bone.
Joh 15:4,5 2 Bakor 3:5 Bafil 2:13 Bafil 2:12 Bah 6:11,12 Isa 62:7
4. Ba mo kobamelong ya bone mo [Modimong] ba gorogang kwa godimodimo mo go kgonegang mo botshelong jo, ba santse ba le kgakala le go kgona go diragatsa ditiro tsa "supererogation" (ke gore, go dira go feta ka fa Modimo a batlang ka teng) ka gore ba thaelela kgakala mo dilong tse e leng tshwanelo ya bone go di dira.
Joh 9:2,3 Bag 5:17 Luk 17:10
5. Ga re ka ke, ka ditiro tsa rona tse di gaisang, ra tshwanelwa ke boitshwarelo jwa bolelo kgotsa botshelo jo bo sa khutleng go tswa mo seatleng sa Modimo ka ntlha ya gore ditiro tseo ga di ka ke tsa lekannwa le kgalalelo e e tlang. Gape, ka ntlha ya sekgala se segolo fa gare ga rona le Modimo, ditiro tsa rona ga di ka ke tsa tswela Modimo mosola kgotsa go duelela sekoloto sa maleo a rona a kgale. Fa re dirile gotlhe mo re ka go kgonang, re dirile fela mo e leng tiro e e re lebagang, re santse re le batlhanka ba ba bokoa. Ka ntlha e nngwe, fa ditiro tsa rona di le dintle ke ka gore di dirilwe ka nonofo ya Mowa, gape sengwe le sengwe se re se dirang se leswafaditswe se tlhakatlhakane le bokoa jo bontsi thata le makoa mo e leng gore ga se ka ke sa emelana le katlholo ya Modimo e e tseletseng.
Bar 3:20 Baef 2:8,9 Bar 4,6 Bag 5:22,23 Isa 64:6 Dip 143:2
6. Le fa badumedi ba amogelwa ka bongwe ka bongwe mo ka ntlha ya ga Keresete, ditiro tsa bone tse dintle le tsone di amogelwa mo go Keresete. Ga se gore go ntse jaaka e ka re mo botshelong jo ga ba na selabe le fa e le molato fa pele ga Modimo, mme o ba leba ba le mo go Morwaagwe, e bile o itumelela go amogela le go lebogela se se senang boferefe, le go na le bokoa le dipphoso tse dintsi.
Baef 1:6 1 Pet 2:5 Math 25:21,23 Bah 6:10
7. Fa e le ditiro tse di dirwang ke ba ba sa tsalwang sesha, le fa e ka tswa e dilo tse Modimo a di laolelang, e bile di ka tswa di le mosola mo go bone le ba bangwe, di nna e le ditiro tsa bolelo ka gore di tswa mo pelong e e sa tlhatsiwiwang ke tumelo. Le fa e go diriwa ka mokgwa o o tsamaelanang le

Lefoko, le maikaelelo a tsone ga se go galaletsa Modimo. Jalo he ditiro tsa go nna jalo ga di ka ke tsa kgalha Modimo le fa e le go dira gore motho a amogelwe go newa tshegofatso mo Modimong. Le fa go ntse jalo go ikgatholosa ditiro tseo ke boleo jo bo gaisang e bile ga go itumedise Modimo.
 2 Dikg 10:30 1 Dikg 21:27,29 Gen 4:5 Bah 11:4,6 1 Bakor 13:1
 Math 6:2,5 Amos 5:21,22 Bar 9:16 Tit 3:5 Job 21:14,15
 Math 25:41-43

KGAOLO 17

GO NNELA RURI MO TUMELONG

1. Baitshenkedwi ke ba Modimo a ba amogetseng mo go [Keresete] Moratiwa, ba bileditswe tumelong, ba ntlafaditswe ke Mowa, ba filwe tumelo e e tlhokegang ya baitshenkedwi. Ba ga ka ke ba wa gotlhelele mo seemong sa tshegofatso, mme ba tlaa itshokela tshegofatso go ya bokhutlong ba bo ba bolokwa ka bosakhutleng. Gonne Modimo ga a ka ke ikwatlaela dineo le pitso tsa gagwe, ka jalo o tswela a ba tsamaisa a ba nonotsha mo tumelong ya bone, boikwatlhao, lorato, boitumelo, tsholofelo, le ditshegofatso tsotlhe tsa Mowa tse di isang botshelong jo bo sa khutleng.

Matsubutsu le merwalela e mentsi a ka tsoga ya ba betsaka, mme dilo tse ga di ka ke tsa kgona go bo ntsha mo motheong le mo lefikeng le ba ngapareditsweng mo go lone ka tumelo. Le fa ntswa go tlhoka tumelo le dithaelo tsa ga Saatane di dira gore ka dinako tse dingwe go bona le go ikutlwela lesedi le lorato lwa Modimo di ba fitlhegele, mme fela Modimo ga o fetoge mme ba tlhomamisa fa ba tlaa tshegediwa ke nonofo ya Modimo go fitlhelela poloko ya bone e wediwa. Jalo he ba tlaa itumelela boswa jo bo rekilweng jo e leng jwa bone, ka gore ba kwadilwe mo diatleng tsa gagwe, le maina a bone a kwadilwe mo bukeng ya botshelo go simologa kwa bosakhutleng.

Joh 10:28,29 Bafil 1:6 2 Tim 2:19 1 Joh 2:19 Dip 89:31,32
 1 Bakor 11:32 Mal 3:6

2. Boitshoko jo jwa badumedi ga bo a ikacga ka boikgethelo jwa go rata ga bone, mme ka taolo ya boithenkelo e e sa fetogeng, e e tswang mo loratong lo lo gololesegileng lo lo sa fetogeng lwa ga Modimo Rara. Gape e ikaegile ka nonofo ya bokgoni jwa dithapelelo tsa ga Jesu Keresete le tshwaragano ya bone le ene, maikano a Modimo, go nna mo go bone ga Mowa wa gagwe, peo ya Modimo mo go bone, boleng jwa kgolagano ya tshegofatso, e mo go yone gape go tswang tlhomamiso le gonnela ruri ga yone.

Bar 8:30; 9:11,16 Bar 5:9,10 Joh 14:19 Bah 6:17,18 1 Joh 3:9
 Jer 32:40

3. Ba ka wela mp boleong jo bo boitshegang ka ntsha ya dithaelo tsa ga Saatane le lefatshe, nonofo ya tshenyego e e sa ntseng e setse mo go bone, le go ithokomolosa tse di isang kwa tlhokomelong ya bone, ba wela mo maleong a a maswe, ba bo ba tswela foo ka nakwana, mo go dirang gore ba welwe ke gosaitumeleng ga Modimo le go futsafatsa Mowa o o Boitshepo, ba tla mo seemong sa gore ditshegofatso le dikgomotso tsa bone di gobale, dipelo tsa

bone di thatafale, le matswalo a bone a gobadiwe, ba utluse ba bangwe le go ba hutsafatsa, le go itsisesa kotlhao ya nakwana, mme ba tla ntshwafatsa boikwatlhao jwa bone ba bo ba tshegediwa ka tumelo mo go Jesu Keresete go ya bokhutlong.

Math 26:70,72,74 Isa 64:5,9 Baef 4:30 Dip 51:10,12 Dip 32:3,4
 2 Sam 12:14 Luk 22:32,61,62

KGAOLO 18

KA GA TLHOMAMISO YA TSHEGOFATSO LE POLOKO

1. Le fa badumedi ba nakwana le batho ba bangwe ba ba sa sokologang ba ka itsietsa ka ditsholofelo tse e seng tsone le go abelela ga senama gore ba kgalha Modimo e bile ba mo seemong sa poloko, tsholofelo e o ya bone e tlaa nyelela; mme ba ba dumelang ka boammaaruri mo go Morena Jesu, ba mo rata ka boammaaruri, ba ikaelela go tsamaya ka segakolodi se se phepa fa pele ga gagwe, ba ka tlhomamisediwa mmo botshelong jo gore ba mo seemong sa tshegofatso, e bile ba ka itumela mo tsholofelong ya kgalelo ya Modimo, tsholofelo e e se kitlang e ba tlabisa ditlhong.

Joh 8:13,14 Math 7:22,23 1 Joh 2:3; 3:14,18,19,21,24; 5:13 Bar 5:2,5

2. Tlhomamiso e ga se go abelela le maithamako fela a a ikaegileng ka tsholofelo e e senang motheo, mme ke tlhomamiso e e senang selabe ya tumelo e e ikaegileng ka madi le tshiamo ya ga Keresete e e senotsweng mo Efangeleng; gape le mo bosuping jo bo ka fa teng jwa ditshegofatso tseo tsa Mowa mo go ba ba solofeditsweng, le mo bopaking jwa Mowa wa go fiwa bongwana, o paka le mewa ya rona gore re bana ba Modimo; le gore, jaaka loungo lwa gone, e baya pelo e le boingotlo le boitshepo.

Bah 6:11,19 Bah 6:17,18 2 Pet 1:4,5,10,11 Bar 8:15,16 1 Joh 3:1-3

3. Tlhomamiso e e nitameng e ga e tswa mo boleng jwa tumelo, mme modumedi wa boammaaruri o ka leta ka lobaka lo lo leele, le go tla kgalhanong le dikgoreletsi tse dintsi pele ga a e bona; mme o kgontshiwa ke Mowa go itse dilo tse a di filweng fela ke Modimo, mme o ka, go sena tshenolelo e e haphegileng, ka go dirisa didirisiwa tse di lebanyeng, ba goroga ko o; ka jalo ke boikarabelo jwa mongwe le mongwe go thagafalela go tlhomamisa pitso le boitumelo mo Moweng o o Boitshepo, mo loratong le malebogo mo Modimong, le mo nonofong le boitumelo mo ditirong tsa kutlo, e le maungo a a thamaletseng a tlhomamiso ya poloko;- e kgakala le go isa batho mo go iteseletseng.

Isa 50:10 Dip 88 Dip 77:1-12 1 Joh 4:13 Bah 6:11,12
 Bar 5:1,2,5; 14:17 Dip 119:32 Bar 6:1,2 Tit 2:11,12,14

4. Tlhomamiso ya poloko ya badumedi ba boammaaruri e ka tshikhinngwa, ya fokodiwa, le go thaselwa ka ditsela tse di farologanyeng; e ka tswa e le ka botlhaswa jwa go tlhoka go e tlhokomela, ka go wela mo boleong bongwe jo tlhokofatsang segakolodi le go hutsahatsa Mowa; ka dithaelo tsa tshoganetso tse di mahehe, ka Modimo a tlosa lesedi la sefatlhego sa gagwe, le go letlelela ba ba mmoifang go tsamaya mo lefifing ba sena lesedi, mme ga ba nke ba tlhoka peo ya Modimo le botshelo jwa tumelo, lorato lwa ga Keresete le bakaulengwe, bophepa jwa pelo le segakolodi sa boikarabelo mo go tswang,

ka tiro ya Mowa, tlhomamiso e ka nako e e tshwanetseng e ka buslediwa, e ka yone, mo nakong ya gompiano, ba sirelediwa mo boitlhobogong jo bo bogolo.

Cant.5:2,3,6 Dip 51:8,12,14 Dip 116:11; 77:7,8; 31:22 Dip 30:7
1 Joh 3:9 Luk 22:32 Dip 42:5,11 Dikh 3:26-31

KGAOLO 19 KA GA MOLAO WA MODIMO

1. Modimo o neile Atame molao o o obamelwang ke botlhe o kwadilwe mo pelong ya gagwe, le taelo e e haphegileng ya gore a se ka a ja loungo lwa setlhare sa kitso ya molemo le bosula; e a mo bofileng ka yone le dikokomane tsa gagwe gore ba e tshetsetse ka namana, yotlhe, ka tlhomamo, le ka dinako tsotlhe; a solofetsa botshelo fa a e diragatsa, le go tshosa ka loso fa a e roba, a mo fa nonofo le bokgoni jwa go e tshetsetsa.
Gen 1:27 Mor 7:29 Bar 10:5 Bag 3:10,12
2. One molao o o neng o kwadilwe mo pelong ya moth o ne wa tswela go nna taolo e e tlhamaletse ya tshiamo morago ga go wa, mme o ne wa ntshiwa ke Modimo mo thabeng ya Sinai, mo melawaneng e e lesome, e kwadilwe mo mabating a mabedi, ya ntsha e mene e bua ka maikarabelo a rona kwa Modimong, e mengwe e merataro, maikarabelo a rona mo mothong.
Bar 2:14,15 Dut 10:4
3. Kwa ntle ga molao o, o ka tlwaelo o bidiwang molao wa boitshwaro, go ne ga kgatlha Modimo go fa batho ba Iseraele melao e mengwe ya mediro, e bua ka ditaelo dingwe tse di tsamaelanang, tse dingwe e le tsa kobamelo, e le meriti ya ga Keresete, ditshegofatso tsa gagwe, ditiro, pogisego, le tse a di fang; mme e gape e tshotse melawana e e farologanyeng ka maikarabelo a boitshwaro. Melawana ya mediro e ne e beilwe fela go fithelela ka nako ya Kgolaganano e Ntsha, fa Jesu Keresete a e diragatsa a ba a e tlosa, ka gore e ne e le Mesia wa boammaaruri le mofi wa molao yo o esi, e bile o ne a filwe nonofo ya go dira se ke rara.
Bah 10:1 Bakol 2:17 1 Bakor 5:7 Bakol 2:14,16,17 Baef 2:14,16
4. Gape o ne a fa batho ba Iseraele melao ya lefatshe le puso e e farologanyeng e e neng ya fela fa ba sa tlhole ba le tshaba. E ga e patelediwe ope gompiano ka ntsha ya gore ba mo tshabeng eo, mme dintsha tsa one tsa tekatekano di tswela di na le tiriso mo dinakong tsa gompiano.
1 Bakor 9:8-10
5. Kutlo mo moalong wa boitshwaro e batliwa mo go botlhe ka bosaengkae, mo go ba ba siamisitsweng le ba bangwe, ka ntsha ya boleng jwa molao, gape le ka taolo ya Modimo Mmopi yo o fileng molao. Ga go ka tsela epe e Keresete mo Efangeleng a senyang molao, mme tota ka ntsha e nngwe o gagamatsa maikarabelo a rona [a go obamela molao wa boitshwaro].
Bar 13:8-10 Jak 2:8,10-12 Jak 2 10,11 Math 5:17-19 Bar 3:31
6. Le fa ntswa badumedi ba boammaaruri ba se ka fa tlase ga molao jaaka mo kgolaganong ya ditiro go tla ba siamisiwa kgotsa ba atholwa ka one, o mosola

mo go bone le mo go ba bangwe, ka gore ka taolo ya botshelo o ba kaela ka go rata ga Modimo le maikarabelo a bone, o ba o ba kaela o ba pateletsa go tshela ka fa tshwanelong.

Gape o senola tshenyego e e tlisitsweng ke bolelo ya boleng jwa bone, dipelo le matshelo, mme jaaka ba o dirisa go itlhatlhoba, ba tla mo boitemogelong jo bogolo jwa bolco, boingotlo ka ntsha ya bolelo, le kilo ya bolelo. Gape ba bona ka tlhamalalo gore ba tlhoka Keresete, le ka fa ba obametseng molao ka tlhamalalo ka teng.

Gape o mosola gore ba ba sokologileng ba lwantshe tshenyego ya bone ka gore o iletsa bolelo. Ditshagiso tsa moalo di diretswe go supa gore maleo a bone a tshwanetswe ke eng, le mathata a ba ka a solofelang mo botshelong jo ka ntsha ya maleo a bone, le ntswa ba golotswe mo phutsong le merwalo e e sa feleng ya molao.

Ditsholofetso tsa molao gape di supetsa badumedi gore Modimo o lebogela kutlo, le ditshegofatso tse ba ka di solofelang fa molao o tshagediwa, ntswa ditshegofatso e se tsa bone ka ntsha ya go tshetsetsa molao jaaka kgolaganano ya ditiro. Fa mongwe a dira tshiamo a iphapaanya le bosula fela ka gore molao o rotloetsa tshiamo o kganela bosula, mo o ga se bosupi jwa gore motho o ka fa tlase ga molao e seng tshegofatso.

Ditiro 13:39; Bar 6:14; 8:1; 10:4; Bag 2:16; 4:4-5 Bar 7:12,22,25
Dip 19:4-6 1 Bakor 7:19 Bar 3:20; 7:7,9,14,24; 8:3 Jak 1:23-25
Jak 2:11; Dip 119:109,104,128 Baef 6:2,3; Dip 37:11; Math 5:6;
Dip 19:11 Luk 17:10 Bona lokwalo lwa Diane; Math 3:7; Luk 13:3,5
Ditiro 2:40 Bah 11:26; 1 Pet 3:8-13

7. Ditiriso tse tsa molao ga di kgathanong le tshegofatso ya Efangele, mme ka gotlhe e tlhamaletse le yone, ka gore Mowa wa ga Keresete o fenywa o bo o o fa keletso ya motho nonofo ya go dira ka kgololesego le ka boitumelo se gorata ga Modimo mo go senotsweng mo molaong go laolang gore se dirwe.
Bag 3:21 Jer 31:33; Esek 36:27; Bar 8:4 Tit 2:14

KGAOLO 20 EFANGELE LE BOPHARA JWA TSHEGOFATSO

1. Jaaka kgolaganano ya ditiro e ne ya senngwa ke bolelo ya ba ya palelwa ke naya botshelo, go ne ga kgatlha Modimo go solofetsa Keresete, peo ya mosadi, jaaka sedirisiwa sa go bitsa baitshenkedwi le go tlisa mo botshelong mo go bone tumelop le boikwatlhao. Mo tsholofetsong e Efangele e ne ya senolwa e le yone e dirisiwang go biletsa polokong go tlisa tshokologo le poloko ya baleofi.
Gen 3:15 le Baef 2:12 Bag 4:4 Bah 11:13 Luk 2:25,38; 23:51
Bar 4:13-16 Bag 3:15-22
2. Tsholofetso e ya ga Keresete le poloko ka ene, e senolwa mo Lefokong la Modimo fela le le losi. Ditiro tsa lobopo kgotsa tlhokomelo ya Modimo, kgotsa lesedi la tlhologo, ga di senole Keresete le fa e le tshegofatso ya gagwe, le fa e le ka mokgwa o o fithegileng. Jaanong batho ba ba senang tshenolelo ka ga Keresete ka tsholofetso ya Efangele bone, ba ka kgontshiwa jang go goroga kwa tumelong e e bolokang kgotsa boikwatlhao.

Ditiro 4:12 Baroma 10:13-15 Dip 19 Bar 1:18-23 Bar 2:12a
Math 28:18-20 Luk 24:46,47 le Ditiro 17:29-30 Bar 3:9-20

3. Tshenolo ya Efangele mo baleofing e neilwe ka dinako tse di farologaneng le mo mafelong a a farologaneng, gammogo le ditsholofetso le ditaalo tsa kutlo e e e batlang. Jaanong mo merafeng le mo bathong ba ba e neilweng, mo gotlhe go ikaegile ka gorata le go itumela mo go molemo ga Modimo. Ga e ise e ke e neelwe ope wa bone ka ntlha ya ditsholofetso tsa go tokafatsa bokgoni jwa bone jwa tlhologo jo bo tlleng ka ntlha ya lesedi la tlhologo go sena Efangele – ga go na ope yo o kileng a dira tsholofetso ya go nna jalo, e bile ga gona ope yo o ka dirang jalo. Ka jalo, mo dingwageng tse tsotlhe, thero ya Efangele e neilwe batho le merafe, e ka tswa e le ka selekanyo se segolo kgotsa se senye, ka dilekanyo tse di farologaneng, go ya ka fa kgakololong ya gorata ga Modimo,
Math 11:20
4. Efangele ke yone fela sedirisiwa se se ka kwantle sa go senola Keresete le tshogofatso e e bolokang, mme ka go nna jalo e lekane go dira tiro e o. Mme le fa go ntse jalo batho ba ba suleng mo ditlong ba tshwanetse go tsalwa sesha, ba tlisiwe mo botshelong kgotsa ba fetolwe, mo e leng tiro e e se ka keng ya kganelwa, e e masetla ya Mowa o o Boitshepo mo karolong nngwe le nngwe ya mowa e tlhokafala go tliša mo go bone botshelo jo bosha jwa semowa. Kwa ntle ga se ga gona sepe gape se se ka tlišang tshokologelo ya bone kwa Modimong.
Bar 1:16,17 Joh 6:44 1 Bakor 1:22-24; 2:14 2 Bakor 4:4,6

KGAOLO 21

KGOLOLESEGO YA SEKERETE LE KGOLOLESEGO YA SEGAKOLODI

1. Kgololesego e Keresete a e dueletseng badumedi ka fa tlase ga Efangele e tlhakantse kgololesego ya bone mo molatong wa boleo, tshakgalo e e atholang ya Modimo, le bogale le phutso ya molao [wa boitswaro]. Gape e tsentsa le kgololo ya bone mo lefatsheng le le bosula le, botshwarwa mo go Saatane, puso ya boleo, matshwenyego a botlhoko, poifo ya malomo a loso, pheno ya lebitla, le kwathao ya bosakhutleng. Fa godimo moo, e tsentsa le kgololesego ya go atamela Modimo, le bokgoni jwa go mo utlwa, e seng ka ntlha ya poifo, mme e le ka dipelo tsa bongwana, le ka ditlhaloganyo tse di ratang.

Ditshogofatso tse ka tsela e nngwe di ne di aroganngwa le badumedi ba ba neng ba le ka fa tlase ga molao [wa Kgolagano e Kgologolo]; mme, ka fa tlase ga Kgololagano e Ntsha, kgololesego ya badumedi e godisiwa le go feta ke kgololesego ya bone mo jokweng ya molao wa mediro o Bajuta ba neng ba le ka fa tlase ga one. Gape re na le bopelokgale jo bogolo jwa go tla pele ga setulo sa bogosi sa tshogofatso, le go abelwa mo go tletseng ga Mowa wa kgololesego wa Modimo go gaisa ka fa badumedi ba ba neng ba le ka fa tlase ga molao ba ne ba tle ba e ikutiwele.

Joh 3:36; Baroma 8:33; Bagal 5:4; Baef 2:1-3; Ditiro 26:18; Baroma 6:14-18

2. Modimo ka esi ke morena wa segakolodi, e bile o se tlogetse se gololesegele mo ditlamong tsa dithuto le melao ya batho e ka tsela nngwe e leng kgatllhanong le le Lefoko la gagwe kgotsa e le mo go lone. Ka jalo go dumela dithuto tseo, kgotsa go ikobela ditaalo tseo kgatllhanong le segakolodi, e go latofatsa kgololesego ya boammaaruri ya segakolodi. Go batla tumelo e e bohitha, kgotsa boikobo jo bo feletseng jwa bofofu, ke go senya kgololesego ya segakolodi le kakanyo.
Jak 4:12 Bar 14:4 Bag 5:1 Ditiro 4:19; 5:29 1 Bakor 7:23 Math 15:9
Bakol 2:20,22-23; 5:1 Bar 10:17; 14:23 Ditiro 17:17 Joh 4:22
1 Bakor 3:5 2 Bakor 1:24
3. Ba ba dirang boleo bongwe kgotsa ba fitlhile boleo bongwe mo dipelong tsa bone ba iphitlhile ka gore ba dirisa kgololesego ya segakolodi sa Sekeresete, ba senya maikaelelo a tshogofatso ya Efangele go isa kwa tshenyegong ya bone. Ba senya gotlhelale maikaelelo a kgololesego ya Sekeresete, e e leng gore (re se na go gololwa mo babeng botlhe ba rona [ba semowa]) re kgone go direla Morena go sena poifo, ka boitshepo le tshiamo fa pele ga gagwe malatsi otlhe a botshelo jwa rona.
Bar 6:1-2 Luk 1:74-75 Bar14:9 Bag 5:13 2 Pet 2:18,21

KGAOLO 22

KOBAMELO, LE LETSATS LA MORENA

1. Lesedi la la tlhologo le supa gore go na le Modimo yo o nang le borena le puso mo go botlhe. O tshiamo e bile o direla botlhe tshiamo. Ka jalo o tshwanetse go boifiwa, a ratiwe, a galalediwe, a bidiwe, a tshepiwe, a bo a direlwe ka pelo yotlhe le tlhaloganyo le nonofo yotlhe.

Mme tsela e e amogelesegang ya go obamela Modimo wa boammaaruri e tlhomilwe ke ene ya bo ya beelwa mabaka ke gorata ga gagwe mo go senotsweng. Ga a tshwanela go obamelwa go ya ka dikakanyetso tsa setho, kgotsa mekgwa, le fa e le go ya ka megopolo ya ga Saatane, le fa e le ka setshwantho sepe se se bonalang, kgotsa ka tsela epe e e sa senolwang mo Lokwalong lo lo Boitshepo.

Jer 10:7 Mar 12:33 Gen 4:1-5 Ekes 20:4-6 Math 15:3,8-9 2 Dikg 16:10-18 Lef 10:1-3 Dut 17:3; 4:2; 12:29-32 Jos 1:7; 23:6-8
Math15:13 Bakol 2:20-13 2 Tim 3:15-17

2. Kobamelo e tshwanetse go neelwa Modimo Rara, Morwa, le Mowa o o Boitshepo, ene a le nosi, e seng baengele, baitshephi, kgotsa dibopiwa dingwe fela. Go simolola ka nako ya go wa kobamelo ga e a tshwanela go dirwa go sena moemedi, kgotsa ka moemedi ope kwa ntle ga ga Keresete a le esi.
Math 4:9-10 Joh 5:23 2 Bakor 13:14 Bar 1:25 Bakol 2:10 Tsh 19:10
Joh 14:6 Baef 2:18 Bakol 3:17 1 Tim 2:5
3. Thapelo e e tletseng malebogo, e le karolo nngwe ya kobamelo, e batliwa ke Modimo mo bathong botlhe. Mme gore e amogelesege, e tshwanetse go dirwa ka leina la Morwa, ka thuso ya Mowa o o Boitshepo, ka fa gorateng ga gagwe. E tshwanetse gape ya dirwa ka tlhaloganyo, tlotlo, boikobo, tlhoafalo, tumelo, lorato le bopelotelele, mme fa go na le batho ba bangwe ka puo e e itseweng.

Dip 95:1-7; 100:1-5 Joh 14:13-14 Bar 8:26 1 Joh 5:14 Dip 47:7 Ekes 4:1-2 Bah
12:28 Gen 18:27 Jak 5:16; 1:6-7 Mar 11:24 Math 6:12, 14-15 Bakol4:2 Baef 6:18
1 Baokr 14:13-19, 27-28

4. Thapelo e tshwanetse go direlwa dilo tse di ka fa molaong, mefuta yotlhe ya batho ba ba tshelang gompieno kgotsa ba ba tla tshelang mo isagweng. Thapela ga e a tshwanela go direlwa baswi, kgotsa ba go itseweng gore ba leofile boleo jo bo isang losong.
1 Joh 4:14 1 Tim 2:1-2 Joh 17:20 2 Sam 12:23 Luk 16:25-26 Tsh 14:13
1 Joh 5:16
5. Palo ya Dikwalo, thero le go reetsa Lefoko la Modimo, go ruta le go kgalemelana ka dipesalema le difela le dipina tsa semowa, kopela ka boitumelo mo dipelong tsa rona mo Moreneng, le kolobetso le Selalelo sa Morena, tsotlhe ke dikarolo tsa kobamelo Modimo. Tse tsotlhe di tshwanetse di dirwa e le kutlo mo go ene, ka go tlhologanya, tumelo, tlotlo le poifo Modimo. Gape se se tshwanetseng go dirisiwa mo dinakong tse di haphegileng ka mokgwa o o boitshepo wa kobamelo, ke dinako tsa boikokobetso, le go itima dijo le malebogo.
Ditiro 15:21 1 Tim 4:13 Tsh 1:3 2 Tim 4:2 Luk 8:18 Baef 5:19 Bakol 3:16 Math 28:19-20 1 Bakor 11:26 Ekes 15:1-19 Dip 107 Eset 4:16
Joel 2:12 Math 9:15 Ditiro 13:2-3 1 Bakor 7:5
6. Ka fa tlase ga Efangele, ga go a tshwanela gore thapelo kgotsa karolo epe fela ya kobamelo ya tumelo e golaganngwe le, kgotsa e dirwe gore e amogesele ke lefelo lepe fela le e direlwang mo go lone, kgotsa kwa e lebagantsweng teng. Modimo o tshwanetse go obamelwa gongwe le gongwe ka mowa le boammaaruri, e ka tswa e le letsatsi le letsatsi mo sephiring mo malwapeng, kgotsa mo sephiring motho a le esi, kgotsa ka boikokobetso mo diphuthegong tsa sechaba. Tsa bofelo ga di a tshwanelwa go itlhokomolosiwa kgotsa go latlhiwa, ka gore Modimo o re biletsa mo tsone ka lefoko la gagwe le tlhokomelo ya gagwe.
Joh 4:21 Mal 1:1 1 Tim 2:8 Joh 4:23-24 Math 6:11 Dut 6:6-7 Job 1:5
1 Pet 3:7 Math 6:6 Dpi 84:1-2 Math 18:20 1 Bakor 3:16; 14:25 Baef 2:21-27
Ditiro 2:42 Bah 10:25
7. Jaaka e le molao wa gore karolo nngwe ya nako gore ka fa taolong ya Modimo e seegelwe fa thoko e le ya kobamelo Modimo, jalo he , mo Lefokong la gagwe o neile taolo e e tlhamaletseng, ya boitshwaro, e e nnetse ruri, e tlama batho botlhe mo methheng yotlhe. O beile letsatsi le le lengwe fela gore le nne Sabata gore le tshagediwe le le boitshepo mo go ene. Go tswa tshimologong ya lefatshe go tsena ka tsogo ya ga Keresete e ne e le letsatsi la bofelo la beke, mme go tswa ka letsatsi la tsogo ya ga Keresete le fetoletswe mo letsatsing la bofelo la beke le le bidiwang letsatsi la Morena. Se se

tshwanetse go tseledisiwa go fithelela kwa bokhutlong jwa lefatshe jaaka Sabata wa Sekeresete, go tshegetsatsi la ntlha la beke go nyeleditswe.
Gen 2:3 Ekes 20:8-11 Mar 2:27-28 Tsh 1:10 Joh 20:1 Ditiro 2:1; 20:7
1 Bakor 16:1 Tsh 1:10 Bakol 2:16-17

8. Batho ba tshegetsatsi Sabata e le boitshepo mo Moreneng fa (morago ga paakanyo e e lebanyeng ya dipelo tsa bone le go baya sentle mananeo a bone a letsatsi le letsatsi) ba tshegetsatsi mo letsatsing leo boikhutso jo bo boitshepo go tswa mo ditirong tsa bone, mafoko, le dikakanyo ka ga ditiro tsa bone tsa selefatshe le boitapoloso, mme ba bo ba seegela letsatsi leo lotlhe mo nakong ya kobamelo Modimo ya sechaba le ya sephiri, le go dira ditiro tse di tlhokafalang le tsa kutlwelobotlhoko.
Ekes 20:8-11 Neh 13:15-22 Isa 58:13-14 Tsh 1:10 Math 12:1-13 Mar 2:27-28

KGAOLO 23 MAIKANO A A LETLELSEGANG

1. Maikano a a letleselesegang ke tiro ya kobamelo a e leng gore motho o ikana mo leseding la boammaaruri, tshiamo, le dikatloho tsa Modimo, ka tlhoafalo a bitsa Modimo go nna mosupi wa se a se ikanelang, le go mo athola ka fa boammaaruring kgotsa go tlhoka boammaaruri jwa seo.
Dut 10:20 Ekes 20:7 Lef 19:12 2 Bakor 6:22-23 2 Bakor 1:23
2. Batho ba tshwanetse go ikana ka leina la Modimo ka losi, e bile leina la gagwe le tshwanetse go dirisiwa ka poifo le tlotlo e kgolo. Go ikana mo lefeleng kgotsa ka botlhaswa ka leina leo le le galatlang le le boitshegang, kgotsa go ikana ka sengwe se sele fela, go bolele e bile go tshwanetse go ilwa. Maikano a letlelelwa ke Lefoko la Modimo mo dilong tse di bokete tse di tlhoafetseng go tlhomamisa boammaaruri le fedisa kgotlhang, ka jalo maikano a a ka fa molaong fa pele ga mmusi wa molao a tshwanetse gore mo diemong tse di ntseng jalo a dirwe.
Dut 6:13 Ekes 20:7 Jer 5:7 Bah 6:13-16 Gen 24:3; 47:30-31; 50:25
1 Dikg 17:1 Neh 13:25; 5:12 Eser 10:5 Dipalo 5:19,21 1 Dikg 8:31
Ekes 22:11 Isa 45:23; 65:16 Math 26:62-64 Bar 1:9 2 Bakor 1:23 Ditiro 18:18
3. Mongwe le mongwe yo o tsayang maikano a a letlelelwang ke Lefoko la Modimo o tshwanetse a lemoga tlhoafalo ya tiragalo e e masisi e o, le go tlhomamisa sepe fela kwa ntle ga se a itseng e le boammaaruri. Ka ntlha ya gore ka maikano a lefela, a a senang boammaaruri, a a lolea Morena o a kgoposisiwa e bile ka ntlha ya one sechaba se tliisiwa mo matlhotlhapelong.
Ekes 20:7 Lef 19:12 Dipalo 30:2 Jer 4:2
4. Maikano a tshwanetse go dirwa ka tsela e e tlhamaletseng e e tlwaelesengileng ya mafoko, go sena ketsaetsego le poelomorago ya tlhologanyo.
Dip 24:4 Jer 4:2
5. Maikano ga a tshwanela go direlwa sebopiwa sepe, fa e se Modimo fela, mme a tshwanetse go dirwa ka tlhokomelo e kgolo thata le boikanyego. Mme maikano a *monastic* a go nna motho a sa nyale, a go ineela lehuma, le kutlo ya letsatsi le letsatsi, a kgakala thata le go emela boitekanelo jo bogolo, mme tota,

ke dikgole tsa maitshamako le boleo tse e leng gore Mokeresete ga a tshwanela go ikgolega ka tsone.

Dipalo 30:2-3 Dip 76:11 Jer 44:25-26 Dipalo 30:2 Dip 61:8; 66:13-14

Ekes 5:4-6 Isa 19:21 1 Bakor 6:18 le 7:2, 9 1 Tim 4:3 Baef 4:28 1 Bakor 7:23

Math 19:11-12

KGAOLO 24

PUSO

1. Modimo, Morena le Kgosi e kgolo ya lefatshe lotlhe, o laotse babusi gore ba nne ka fa tlase ga gagwe ba busa batho, go isa kgalalelo kwa go ene le tshiamo mo sechabeng. Ka lebaka o ba papanne ka taolo ya go dirisa nonofo, go femela le kgothatsa ba ba dirang tshiamo, le go otlhaya badira bosula.
Dip 82:1 Luk 12:28 Bar 13:1-6 1 Pet 2:13-14 Gen 6:11-13 le 9:5-6 Dip 58:1-2; 72:14; 82:1-4 Diane 21:15; 24:11-12; 29:14,26; 31:5 Esek 7:23; 45:9 Dna 4:27 Math 22:21 Bar 13:3-4 1 Tim 2:2 1 Pet 2:14 Gen 9:6
Diane 16:14; 18:12; 20:2; 21:15; 28:17 Ditiro25:1 Bar 13:4 1 Pet 2:13-14
2. Go a amogeselega gore Bakeresete ba amogela le go diragatsa boikarabelo jwa ofisi ya sechaba fa ba bilelwa gore ba dire jalo. Mo go diragatseng boikarabelo jwa ofisi ya go nna jalo ba na le boikarabelo jwa go tshagisa tshiamo le kagiso go ya ka fa melaong e e siameng ya sechaba. Ka mabaka a o ba ka (go ya ka fa Kgolaganong e Ntsha) tsena mo ntsweng ka fa molaong fa go siame e bile go tlhokafala.
Ekes 22:8-9 Dan Neh Diane 14:35; 16:10,12; 20:26; 28:15-16; 29:4,14; 31:4-5 Bar 13:2, 4 Luk 3:14 Bar 13:4
3. Jaaka balaodi ba sechaba ba tlhomilwe ke Modimo ka mabaka a neilweng, re tshwanetse re ineele mo ditaolong tsotlhe tsa bone tse di ka fa molaong ka lebaka la Morena, e seng fela go fema kotlhao, mme e le ka lebaka la segaklodi. Re tlamega gape direla babusi le botlhe ba ba leng bagolo mekotletelo le dithapelo, gore ka fa tlase ga bone re ke tshole mo boiketlong le mo tidimalong ka poifomodimo yotlhe le tshisimogo
Diane 16:14-15; 19:12; 20:2, 24:21-22; 25:15; 28:2 Bar 13:1-7 Tit 3:1 1 Pet 2:13-14 Dan 1:8; 3:4-6, 16-17; 6:5-10, 22 Math 22:21
Ditiro 4:19-20; 5:29 Jer 29:7 1 Tim 2:1-4

KGAOLO 25

LONYALO

1. Lonyalo lo tshwanetse go nna fa gare ga monna a le mongwe fela le mosadi a le mongwe fela. Ga go letlelesege gore monna a nne le basadi ba feta bongwe, kgotsa mosadi a nne le banna ba feta bongwe ka nako e le nngwe.
Gen 2:24 le Math 19:5-6 1 Tim 3:2 Tit 1:6
2. Lonyalo lo tlhometswe gore monna le mosadi ba thusane, le go atisa losika lwa mothoo ka bana ba ba tsaletsweng mo lonyalong, le go thibela boitshwaro jo bo maswe.
Gen 2:18 Diane 2:17 Mal 2:14 Gen 1:28 Dip 127:3; 128:3-4 1 Bakor 7:2, 9
3. Go a letlelesega gore batho ba mefuta yotlhe ba nyalane ba ba kgonang go dumela ba itse se ba se dirang, mme ke boikarabelo jwa Bakeresete go nyala

mo Moreneng. Jalo he ba ba ipolelang tumelo ya boammaaruri ga ba a tshwanela go nyalana le batho ba ba sa dumeleng le baobamedi ba medimo ya disetwa. Le fa e le ba ba boifang Modimo ga ba a tshwanela go golegwa ka jokwe e e sa lekalekaneng ka go aynalana le ba ba tshelang matshelo a a bosula, kgotsa ba ba dumelang dithuto tse e seng tsa boammaaruri.

1 Bakor 7:39 2 Bakor 6:14 1 Tim 4:3 Bah 13:4 1 Bakor 7:39

2 Bakor 6:14

4. Lonyalo ga lo a tshwanela go diragala fa gare batho ba masika a a gauifi kgotsa mo masikeng a a sa letlelelweng mo Lefokong la Modimo, ebile manyalo a mofuta o a ka se ke a letlelelwa ke molao ope wa setho le fa e le tumalano ya bobedi gore batho ba go nna jalo ba tshole mmogo jaaka monna le mosadi.
Lef 18:6-18 Amos 2:7 Mar 6:18 1 Bakor 5:1

[Ditemana tse pedi tse di latelang di mo Westminster Confession, e seng mo Baptist Confession]

5. Fa boaka le bogokagadi jo bo dirilweng morago ga peeelo bo lemogiwa pele ga lonyalo, go na le mabaka a a letlelelang yo o seng molato gore a emise tsholofetso e o. Mo mabakeng a boaka morago ga lonyalo, go ka fa molaong gore yo o seng molato a pege kgetsi ya tlhalo, mme morago ga tlhalo a nyale yo mongwe- go tshwana fela jaaka e kete yo o molato o sule.
Math 1:18-20 Math 5:31-32 Math 19:9 Bar 7:2-3
6. Tshenyego ya setho e tla a dira gore mabaka a tsisiwe go kgaoganya bao ba Modimo o ba kopantseng mmogo mo nyalong. Mme tota ga gona sepe kwa ntle ga boaka, kgotsa go ipha naga ga mongwe wa banyalani mo go sekang ga baakannwa ke baeteledipele ba kereke kgotsa ba sechaba, se se lekaneng go kgaola kgolaganano ya lonyalo. Kgaogano ya go nna jalo e tshwanetse ya dirwa mo lefelong la sechaba e bile tsamaiso e e lebanheng ya tiragalo e tshwanetse ya salwa morago; batho ba ba amegang mo go yone ga ba a tshwanela go tlegelwa mo thatong le mo maikutlong a bone.
Math 19:8-9 Bar 7:2-3 1 Bakor 7:15 Math 19:6 Dut 24:1-4

KGAOLO 26

KEREKE

1. Kereke ka bophara (e tlisiswe mo boleng ka tiro e e mo teng ya Mowa le boammaaruri jwa tshagofatso) e ka bidiwa kereke e e sa bonaleng. E dirilwe ka palo e e feletseng ya bakgethwa ba ba , ba e leng, kana ba ba tla phuthiawang mmogo go nna ka fa tlase ga ga Keresete e le tlhogo. Kereke ke monyadiwa , mmele, le botlalo jwa Keresete yo o tlatsang tsotlhe mo go tsotlhe.
Math 16:18 1 Bakor 12:28 Baef 1:22; 4:11-15; 5:23-25,27,29,32 Bakor 1:18, 24 Bah 12:23 Baef 1:22; 4:11-15; 5:23-25, 27, 29, 32 Bakor 1:18, 24 Tsh 21:9-14
2. Batho botlhe mo lefatsheng ba ba ipolelang tumelo ya Efangele ba bo ba obamela Modimo ka Keresete go ya ka fa Efangeleng, le ba ba sa senyeng boipolelo jwa bone ka diphoso tse dikgolo, kgotsa ka boitshwaro jo bo seng boitshupo, ba ka bidiwa baitshephi ba ba bonalng. Diphuthogo tsotlhe di tshwanetse a bo di dirilwe ka batho ba go nna jalo.
1 Bakor 1:2 Bar 1:7-8 Ditiro 11:26 Math 16:18; 18:15-20 1 Bakor 5:1-9

3. Dikereke tse diphepa thata ka fa tlase ga legodimo di kgona go tlhakatlhaka di bo di nna le diphoso, mme tse dingwe di senyegile thata mo e leng gore ga di sa tlhole e le dikereke tsa ga Keresete di fetogile 'disenagoge tsa ga Saatane'. Le fa go ntse jalo, ka nako tsotlhe Keresete o ntse a na le, e bile o tla nna a na le bogosi mo lefatsheng le go fitlhelela bokhutlo jwa nako, e dirilwe ka ba ba dumelang mo go ene ba ipolela leina la gagwe.
1 Bakor 1:11; 5:1; 6:6; 11:19-19 3 Joh 1:9-10 Tsh 2:1-3:22 Tsh 2:5 le 1:20 1 Tim 3:14-15 Tsh 18:2 Math 16:18; 24:14; 28:20 Mar 4:30-32
Dip 72:16-18; 102:28; Isa 9:6-7 Tsh 12:17; 20:7-9
4. Morena Jesu Keresete ke tlhogo ya Kereke. Mo go ene go nna, ka taolo ya ga Rara ka mokgwa o mogolo wa taolo e kgolo, taolo yotlhe ya go bitsa, go tlhoma, go laola le go tsamaisa kereke. Ga gona tsela epe e ka yone Mopapa wa Roma a ka nngang tlhogo ya kereke, mme ke moganetsakeresete, ene 'monna wa sebe', le 'morwa wa tathego', yo o ikgodisang mo kerekeng kgatlhanong le Keresete le gotlhe mo go bidiwang Modimo, yo Morena a tla mo senyang ka kgalalelo ya go tla ga gagwe.
Bakol 1:18 Baef 4:11-16; 1:20-23; 5:23-32 1 Bakor 12:27-28 Joh 17:1-3
Math 28:18-20 Ditiro 5:31 Joh 10:14-16 2 Bath 2:2-9
5. Mo go diragatseng taolo e a e filweng, Morena Jesu, ka bodiredi jwa Lefoko la gagwe le Mowa wa gagwe, o biletsa mo go ene go tswa mo lefatsheng bao ba a ba filweng ke Rara. Ba bilelwa gore ba tsamaye fa pele ga gagwe ka ditsela tsa kutlo tse a di ba laolelang mo Lefokong la gagwe. O laola ba ba biditsweng ka tsela e o go dira diphuthego kgotsa dikereke gore ba kgothatsanye le go tsena mo kobamelong ya sechaba e a batlang fa ba santse ba le mo lefatsheng.
Joh 10:16,23; 12:23; 17:2 Ditiro 5:31-32 Math 28:20 Math 18:15-20
Tit 1:5 1Tim 1:3; 3:14-16; 5:17-22
6. Maloko a dikereke tse ke 'baitshepi' ka pitso mme ba supa mo go bonalang ba a fa bosupi jwa kutlo ya bone mo pitsong ya ga Keresete ka boipoolelo le go tsamaya ga bone. Ba dumalana ka kgololesego go tsamaya mmogo go ya ka fa ditaolong tsa ga Keresete, ba ineela mo go Keresete le mo go bangwekabone ka gorata ga Modimo, ba rurifatsa boineelo jwa bone mo ditaolong tsa Efangele.
Math 28:18-20 Ditiro 14:22-23 Bar 1:7 1 Bakor 1:2 le 1:13-17 1 Bath 1:1
Le 1:2-10 Ditiro 2:37-42; 4:4; 5:13-14 Ditiro 2:41-42; 5:13-14 2 Bakor 9:13
7. Mo kerekeng nngwe le nngwe e e kokoaneng jalo ka fa tlhologanyong [ya ga Keresete] jaaka go boletswe mo Lefokong la ga gagwe, Morena o neile nonofo yotlhe le taolo e e tlhokegang go tsamaisa mokgwa wa kobamelo le kgalemo e a ba laoletseng gore ba di sale morago. Gape o ntshitse ditaolo le melawana ya tiriso e e tlhamaletseng e e siameng ya nonofo e o.
Math 18:17-20 1 Bakor 5:4-5, 13; 2 Bakor 2:6-8
8. Phuthego ya Kereke, e e kokoaneng e tsamaisiwa go ya ka fa tlhologanyong ya ga Keresete, e na le badiredi le maloko. Badiredi ba tlhongwa ke Keresete gore ba tlhophiwe le go seegelwa fa thoko ke kereke ke baokamedi kgotsa bagolwane, le batiakone. Ba tlhomelwa go tlhokomela se Morena a se tlhomileng, le go dirisa nonofo le maikarabelo, a Morena o a ba neileng kgotsa

a o ba biletsang mo go one. Mokgwa o o tshwanetse go tswelediwa go fitlhelela bokhutlong jwa lefatshhe.

Bafil 1: 1 1 Tim 3:1-13 Ditiro 20:17, 28 Tit 1:5-7 1 Pet 5:2

9. Tsela e e tlhomilweng ke Keresete ya go biletsa motho mongwe fela yo o tshwanelwang ebile a neilwe ke Mowa o o Boitshepo go diragatsa tiro ya boruti kgotsa bogolwane, ke gore o tshwanetse a tlhophiwa ke tlhopho ya bokopano jwa kereke ka boyone. O tla seegelwa fa thoko ka tshisibalo ka go itima dijo le thapelo, ka g bewa diatla ke bagolwane ba kereke (fa e le gore go na le bagolwane kgotsa baruti bangwe ba ba tlhomilweng pele ga mo o). Ka mokgwa o o, motiakone le ene o tshwanetse a tlhophiwa ka tlhopho ya kereke a bo a seegelwa fa ka thapelo, ka go bewa diatla.
Baef 4:11 1 Tim 3:1-13 Ditiro 6:1-7 le Math 18:17-20 1 Bakor 5:1-13
1 Tim 4:14; 5:22 Ditiro 6:1-7
10. Tiro ya baruti ke go tlhoafalela tirolo ya ga Keresete mo dikerekeng tsa gagwe, mo tirelong ya Lefoko le thapelo, le go tlhokomela mewa [ya maloko] ka gore ba na le go ikarabela mo go Keresete. Jalo he dikereke tse ba di direlang di tlamegile go ba fa tlotlo e e tshwanetseng, le go ba fa 'dilo tsotlhe tse di molemo' go ya ka fa bokgoning jwa bone, gore ba mme le dikatso tse di kgotsafatsang ba sa itlhakatlhakanye le dilo tsa lefatshhe le, le gore ba kgone go tshola baeng. Se se batliwa ke molao wa tlhologo le taolo e e tlhamaletseng ya Morena wa rona Jesu yo o tlhomileng gore ba ba rerang Efangele ba tshela ka Efangele.
Ditiro 6:4 1 Tim 3:2; 5:17 1 Tim 5:17-18 1 Bakor 9:14 Bag 6: 6-7
2 Tim 2:4 1 Tim 3:2 1 Bakor 9:6-14 1 Tim 5:18
11. Le fa ntswa baokamedi kgotsa baruti ba dikereke ba tlamega go nna ba rera Lefoko jaaka karolo ya boikarabelo jwa bone, mme tota tiro ya go rera Lefoko ga se ya bone ba le nosi. Ba bangwe ba ba neilweng ba bo ba tshwanediwa ke Mowa o o Boitshepo go dira tiro e o, le ba ba amogetsweng, ba biditswe ke kereke, le bone ba ka dira ebile ba tshwanetse go dira tiro e o.
Ditiro 8:5; 11:19-21 1 Pet 4:10-11
12. Badumedi botlhe ba tlamega go ikgolaganya le dikereke fa ba le kwa ba nang le monyetla wa go dira jalo, gore botlhe ba ba amogetsweng mo ditshonong tsa kereke, ba bo gape ba ineetse mo go kgalemelweng le go laolwa ke kereke ka fa pusong ya ga Keresete.
1 Bath 5:14 2 Bath 3:6, 15-16 1 Bakor 5:9-13 Bah 13:17
13. Ga go na maloko ape a kereke a a foseditsweng ke maloko a mangwe, ba ba setseng morago boikarabelo jo bo tlhalositsweng jwa bone malebang le motho yo o ba foseditsweng, ba ba ka senyang tsamaiso ya kereke ka tsela epe. Ebile ga ba a tshwanela go lofela bokopano jwa kereke kgotsa tsamaiso ya selalelo ka ntsha ya kgopisego ya bone, bogolo, ba tshwanetse go emela Keresete le dikgato tse di tshwanetseng mo kerekeng.
Math 18:15-17 Baef 4:2-3 Bakol 3:12-15 1 Joh 2:7-11, 18-19 Math 28:15-17 Baef 4:2-3 Math 28:20
14. Kereke nngwe le nngwe le maloko a yone e tlamega gore ka dinako tsotlhe e rapelele molemo le tswelolepele ya dikereke tsa ga Keresete gongwe le gongwe. Ka dinako tsotlhe dikereke di tshwanetse go thusa badumedi botlhe

go ya ka fa lefolog le pitsong ya tsone go dirisa dineo le ditshegofatso tsa bone. Jalo he, fa dikereke di tlhomilwe ka tlhokomelo ya Modimo gore di tle di akole monyetla le tshono [ya bokopano], di tshwanetse go batla bokopano fa gare ga tsone go kgothatsa kagiso, go oketsa lorato, le go agana.

Joh 13:34-35; 17:11, 21-23 Baef 4:11-16; 6:18 Dip 122:6 Bar 16:1-3
3 Joh 1:8-10 le 2 Joh 1:5-11 Bar 15:26 2 Bakor 8:1-4, 16-24; 9:12-15
Bakol 2:1 le 1:3, 4, 12 Bag 1:2, 22 Bakol 4:16 Tsh 1:4 Bar 16:1-2
3 Joh 1:8-10

15. Fa mathata le dipharologanyo di tsoga mo dintlheng tsa thuto kgotsa tsamaiso ya [kereke] tse di amang kagiso, bongwefela le go agana ga dikereke ka bophara kgotsa mo kerekeng nngwe, kgotsa fa leloko kgotsa maloko a kereke a gobaditswe ke ditsamaiso tsa kotlhao tse di sa tsamaelaneng le boammaaruri [jo bo Lefokong] le tsamaiso ya [kereke], go ka fa tlhaloganyong ya Keresete gore dikereke tse di mo bokopanong mmogo, ka baemedi ba tsone, di kopane go sekaseka ngang e e ngangiwang, di fe kgakololo ya tsone ka yone mo dikerekeng tse di amegang. Le fa go ntse jalo, fa baemedi ba ba phuthegile, ga ba a fiwa nonofo epe ya kereke kgotsa taolo epe mo godimo ga dikereke ka botsone; ga ba ka ke ba diragatsa kotlhao mo dikerekeng kgotsa batho, kgotsa go patelela ditshwetso tsa bone mo dikerekeng kgotsa mo baeteledipeleng ba tsne.

Bag 2:2 Dianne 3:5-7; 12:15; 13:10 1 Bakor 7:25, 36-40 2 Bakor 1:24
1 Joh 4:1

KGAOLO 27 BOKOPANO JWA BADUMEDI

1. Badumedi botlhe ba kopantswe le Jesu Keresete tlhogo ya bone ke Mowa o o Boitshepo le ka tumelo, le fa se se sa ba dire motho a le mongwe fela le ene. Jalo he ba nna le bokopane le ditshegofatso, dipogisego, loso, tsogo, le kgalalelo tsa gagwe. Ba golagantswe le ba bangwe ka lorato, ba nale bokopano mo dineong le ditshegofatso tsa bone, ebile ba tlamega go diragatsa boikarabelo jwa bone, mo pontsheng le mo sephiring, ka tsela e e tlhamaletseng gore ba tle ba tlhomamisa gore mongwe le mongwe o a siamelwa mo dilong tsa semowa le tsa botshelo.

Baef 1:4 Joh 17:2, 6 2 Bakor 5:21 Ba 6:8; 8:17; 8:2 1 Bakor 6:17
2 Pet 1:4 Baef 3:16-17 Bag 2:20 2 Bakor 3:17-18 1 Bakor 8:6 Bakol 1:18-19 1
Tim 6:15-16 Isa 42:8 Dip 45:7 Bah 1:8-9 1 Joh 1:3 Joh 1:16;
15:1-6 Baef 2:4-6 Bar 4:15; 6:1-6 Bafil 3:10 Bakol 3:3-4 Joh 13:34-35;
14:15 Baef 4:15 1 Pet 4:10 Bar 14:7-8 1 Bakor 3:21-23; 12:7, 25-27
Bar 1:12; 12:10-13 1 Bath 5:11, 14 1 Pet 3:8 1 Joh 3:17-18 Bag 6:10

2. Ka boipelelo jwa bone, badumedi ba tlamega go tshegetsatsa bokopano jo bo boitshepo le bongwe fela mo kobamelong Modimo le mo go direng tirelo nngwe fela ya semowa go rotloetsa go agana mmogo ga bone. Ba tshwanetse gape go thusa mo dilong tsa botshelo go ya ka bokgoni le matlhoki a bone. Go ya ka fa taolong ya Efangele, bokopano jo bo ama thata botsalano jwa malwapa le kereke, mme jaaka Modimo a a fa monyetla, bokopano jo bo tshwanetse jwa fetelediwa mo go botlhe ba 'lolwapa lwa tumelo', ke gore

botlhe mo mafelong otlhe ba ba bitsang leina la Morena Jesu. Le fa go ntse jalo, bokopano jo le ba bangwe jaaka badumedi ga go ntshe kgotsa go nyatsa go rua ga dithoto tsa bone le ditsabone tse dingwe.

Bah 3:12-13, 10:24-25 Ditiro 11:29-30 2 Bakor 8-7 Bag 2 Bar 15 1 Tim 5:8, 16
Baef 6:4 1 Bakor 12:27 Ditiro 11:29-30 2 Bakor 8-9 Bag 2; 6:10
Bar 15 Ditiro 5:4 Baef 4:28 Ekes 20:15

KGAOLO 28 KOLOBETSO LE SELALELO SA MORENA

1. Kolobetso le Selalelo sa Morena ke ditirelo tse di tlhomilweng ka tlhamalalo le ka taolo ya borena ke Morena Jesu, mofi wa molao yo o esi, gore di tsweledisiwe mo kerekeng ya gagwe go fitlha bokhutlo jwa lefatshe.
Math 28:19-20 1 Bakor 11:24-25 Math 28:18-20 Bar 6:3-4 1 Bakor 1:13-17 Bag 3:27 Baef 4:5 Bakol 2:12 1 Pet 3:21 1 Bakor 11:26 Luke 22:14-20
2. Ditirelo tse di boitshepo tse di tshwanetse go tsamaisiwa ke ba o ba ba tshwanetsweng ke go dira le ba ba bileditsweng go dira jalo, go ya ka taolong ya ga Keresete.
Math 24:45-51 Luk 12:41-44 1 Bakor 4:1 Tit 1:5-7

KGAOLO 29 KOLOBETSO

1. Kolobetso ke tirelo ya Kgolagano e Ntsha, e e tlhomilweng ke Morena Jesu, gore e nne lotshwao lwa bokopano le Keresete mo losong le mo tsogong ya gagwe, lwa go golaganngwa le ene, lwa go tlosiwa ga malco, le lwa go ineela mo Modimong, ka Jesu Keresete, go tshela le go tsamaya mo bosheng jwa botshelo.
Bar 6:3-5 Bakol 2:12 Bag 3:27 Mar 1:4 Ditiro 22:16 Bar 6:4
2. Ba ba ipolelang tshokologo kwa Modimong, le tumelo mo go ene, le kutlo mo go Morena wa rona Jesu Keresete, ke bone fela ba ba tshwanetseng go tsena mo tirelong e.
Math 3:1-12 Mar 1:4-6 Luk 3:3-6 Math 28:19-20 Mar 16:15-16 Joh 4:1-2
1 Bakor 1:13-17 Ditiro 2:37-47; 8:12-13, 36-38; 9:18; 10:47-48; 11:16; 15:9; 16:14-15, 31-34; 18:8 19:3-5; 2:16 Bar 6:3-4 Bag 3:27 Bakol 2:12 1 Pet 3:21
Jer 31:31-34 Bafil 3:3 Joh 1:12-13 Math 21:43
3. Sesupo sa ka kwa ntle se se tshwanetseng go dirisiwa mo tirelong e ke metsi, a e leng gore motho o tshwanetse go kolobediwa mo go one mo leineng la ga Rara, le la Morwa, le la Mowa o o Boitshepo.
Math 3:11 Ditiro 8:36, 38; 22:16 Math 28:18-20
4. Go tibisa kgotsa go ina motho mo metsing, go botlhokwa go diragatsa tirelo sentle.
2 Dikg 5:14 Dip 69:2 Isa 21:4; Mar 1:5, 8-9 Joh 3:23 Ditiro 8:38 Bar 6:4 Bakol 2:12 Mar 7:3-4; 10:38-39 Luk 12:50 1 Bakor 10:1-2 Math 3:11 Ditiro 1:5, 8; 2:1-4, 17

KGAOLO 30
SELALELO SA MORENA

1. Selalelo sa Morena wa rona se simolotswe ke ene jone bosigo jo a okilweng ka jone, gore se diragadiwe mo dikerekeng tsa gagwe go filthelela bokhutlo jwa lefatshe jaaka segopotso se se nnetseng ruri [sa gagwe] le go bolela setlhabelo sa gagwe mo losong. Se ne sa simololwa go tihomamisa tumelo ya badumedi le dipoelo tsotlhe tsa loso lwa ga Keresete, tswelelopele ya bone ya semowa le kgolo mo go ene, kgothatso ya bone le boineelo mo boikarabelong jo bo mo lebanyeng, le go nna kgolagano le tsholofetso ya bokopano le ene le bangwekabone.
1 Bakor 11:23 Math 26: 20-26 Mar 14:17-22 Luk 22:19-23 Ditiro 2:41-42; 20:7 1 Bakor 11:17-23, 33-34 Mar 14:24-25 Luk 22:17-22 1 Bakor 11:24-26 1 Bakor 11:24-26 Math 26:27-28 Luk 22:19-20 Bar 4:11 Joh 6:29, 35, 47-48 1 Bakor 11:25 1 Bakor 10: 16-17
2. Mo tirelong e Keresete ga a neelwe kwa go Raagwe, le fa e le setlhabelo sepe ga se direlwe go phimola bolelo jwa batshidi le fa e le baswi. Ke segopotso fela sa setlhabelo se Keresete a ineetseng mo mokgorong gangwe fela. Gape ke tshupelo ya semowa ya dikgalaletso tsotlhe tse di kgonafalang go isiwa kwa Modimong mabapi le tiro ya ga Keresete. Ka jalo setlhabelo sa kereke ya Roma sa mmisa, jaaka ba se bitsa, ke letlhapa ebile se senyaka bokao jwa setlhabelo sa ga Keresete se e leng sone fela tshupela ya maleo otlhe a baitshenkedwi.
Joh 19:30 Bah 9:25-28; 10:10-14 Luk 22:19 1 Bakor 11:24-25 Math 26:26-27, 30 le Bah 13:10-16
3. Mo tirelong e Morena Jesu o tihomile badiredi ba gagwe go rapela le go segofatsa senkgwe le mofine (ka jalo ba di beela fa thoko go tswa mo tirisong e e tlwaelesegileng go ya kwa go e e boitshepo), le go tsaya le go robaganya senkgwe, ba bo ba tsaya senwelo, le go neela tsotlhe ba ba jang selalelo, le bone ba tsaya karolo.
1 Bakor 11:23-26 Math 26:26-28 Math 14:22-25 Luk 22:19-22
4. Go tima batho senwelo, go obamela didiriswa tsa selalelo, di tsholediswa di akgelwa kwa le kwa ka lorato, kgotsa di abelwa gape tirelo e e kaiwang le ya sedumedi, tsotlhe di kgatlhanong le boleng jwa tirelo e le tlhomo ya ga Keresete.
Math 26:27 Mar 14:23 1 Bakor 11:25-28 Ekes 20:4-5 Math 15:9
5. Dilo tse di tshwaregang tsa tirelo e, fa di seegetswe fa thoko sentle go dirisediwa tiro e e tihomilweng ke Keresete, di na le bokao ja bo nonofileng mo go Morena o o bapotsweng, nako tse dingwe ka boammaaruri, mme fela e le setshwantsho, di bidiwa ka leina la dilo tse di di emelang, e bong, mmele le madi ga Keresete. Le fa go ntse jalo, ka boleng le tlhologo, di nna fela e le senkgwe le mofine wa boammaaruri jaaka di ne di ntse pele.
1 Bakor 11:27 Math 26:26-27 1 Bakor 11:26-28 Math 26:29
6. Thuto e e tlwaelesegileng ka go bidiwa ya go fetoga, e e reng boleng jwa senkgwe le mofine di fetoga go nna boleng jwa mmele le madi a ga Keresete fa di segofadiwa ke moperesiti kgotsa ka tsela nngwe fela, di herosa dibete e

seng fela mo Dikwalong, mme le kakanyo le kitso e e tlwaelesegileng. E thankgola boleng jwa ditirelo, e setse e dirile ebile e tswelela e tsosa dikabelo tse dintsi le kobamelo ya medimo ya disetwa e e maswe.
Math 26:26-29 Luk 24:36-43, 50-51 Joh 1:14; 20:26-29 Ditiro 1:9-11; 3:21 1 Bakor 11:24-26 Luk 12:1 Tsh 1:20 Gen 17:10-11 Esek 37:11 Gen 41:26-27

7. Baamogedi ba ba tshwanelwang, fa ba tsaya karolo mo didirisiweng tse di bonalang tsa tirelo e, gape ba di amogela ka fa teng ka tumelo, ka boammaaruri, e seng ka nama le madi mme e le ka semowa. Ka go dira jalo ba ja Keresete a bapotswe, ba bo ba amogela dipoelo tsotlhe tsa loso lwa gagwe. Mmele le madi a ga Keresete ga di teng ka sebele, mme ka semowa ka tumelo ya badumedi mo tirelong, fela jaaka didirisiwa le tsone di ntse mo maitemogelong a bone a ka kwantle.
1 Bakor 11:28 Joh 6:29, 35, 47-58 1 Bakor 10:16
8. Batho bothe ba ba senang kutlo le baikepi ba ba senang tshwanelo ya go akola bokopano le Keresete, ga ba a tshwanelwa ke lomati lwa Morena, ebile ga ba ka ke, kwa ntle ga go dira bolelo jo bogolo kgatlhanong le ene, ba tsaya karolo mo masitsegong a a boitshepo a, kgotsa ba amogelwa mo go one ba santse ba ntse jalo. Tota, mongwe fela yo o tsayang karolo a sa tshwanela o molato wa mmele le madi a Morena, o ijela a inwela tshokiso.
Math 7:6 Baef 1:17-24; 5:3-9 Ekes 20:7, 16 1 Bakor 5:9-13 2 Joh 1:10 Ditiro 2:41-42; 20:7 1 Bakor 11:17-22, 33-34 1 Bakor 11:20-22, 27-34

KGAOLO 31
SEEMO SA BATHO MORAGO GA LOSO LE TSOGO YA BASWI

1. Morago ga loso mebele ya batho e boela mo leroleng e a bola, mme mewa ya bone (e e sa sweng kana e e sa robaleng ka e tshelela ruri mo tlhologong ya yone) ka bofefo e boela kwa Modimong yo o e neileng. Mewa ya baitshepi jaanong e siamisiwa mo boitshepong, e amogelwa kwa paradaising kwa ba nang le Keresete ba lebile sefathogo sa Modimo mo leseding le kgalalelo, ba emetse ka botlalo kgololo ya mebele ya bone. Mewa ya baikepi e latlhelwa kwa bobipong, kwa e nnang mo pogisegong le mo lefifing le lentshontsho, e emiseditswe tshokiso ka letsatsi le legolo [la tshokiso]. Ka gore mewa e kgaogana le mebele, baebale ga e lemoge lefelo lepe kwa ntle ga a mabedi.
Gen 2:17; 3:19 Ditiro 13:36 Bar 5:12-21 1 Bakor 15:22 Gen 2:7 Jak 2:26 Math 10:28 Mor 12:7 Dip 23:6 1 Dikg 8:27-49 Isa 63:15; 66:1 Luk 23:43 Ditiro 1:9-11; 3:21 2 Bakor 5:6-8; 12:2-4 Baef 4:10 Bafil 1:21-23 Bah 1:3; 4:14-15; 6:20; 8:1; 9:24; 12:23 Tsh 6:9-11; 14:13; 20:4-6 Luk 16:22-26 Ditiro 1:25 1 Pet 3:19 2 Pet 2:9
2. Ka letsatsi la bofelo, badumedi ba ba sa ntse ba tshela ga ba kitla ba swa, mme ba tla a fetolwa. Baswi bothe ba tla a tsosiwa ka mebele ya bone, (le fa se se tla nna le boleng jo bo farologanyeng) e e tla tshwaragannwang gape le mewa ya yone ka bosaengkae.
1 Bakor 15:50-53 2 Bakor 5:1-4 1 Bath 4:17 Dan 12:2 Joh 5:28-29 Ditiro 24:15 Job 18:26-27 Joh 5:28-29 1 Bakor 15:35-38, 42-44 1 Bakor 15:42-44, 52-54 Dan 12:2 Math 25:46

3. Ka nonofo ya ga Keresete mebele ya basiamolodi e tla tsosediwa dithonnyeng. Ka Mowa wa gagwe mebele ya basiami e tla tsosediwa tlotlo, ka ba tla fetolwa go tshwana le mmele wa gagwe o o galalalang.
Dan 12:2 Joh 5:28-29 Bar 8:1, 11 1 Bakor 15:45 Bag 6:8 1 Bakor 15:42-49 Bar 8:17, 29-30 1 Bakor 15:20-23, 28-49 Bafil3:21 Bakol1:18; 3:4 1 Joh 3:2 Tsh 1:5

KGAOLO 32 KATLHOLO YA BOFELO

1. Modimo o laotse letsatsi le a tileng go athola lefatshe ka tshiamo ka Jesu Keresete, yo Rara a mo neetseng nonofo yotlhe le katlholo. Mo letsatsing le o, ga go ye go atholwa baengele ba ba oleng fela ba le bosu, mme le batho botlhe ba ba tshedileng mo lefatsheng. Ba tla a tla fa pele ga setulo sa katlholo sa ga Keresete go ipolela ka dikakanyo, mafoko, le ditiro tsa bone, le go amogela [katlholo] go ya ka fa dirileng ka teng fa ba sa ntse ba le mo mmeleng, go ka tswa go siame kgotsa go sa siama.
Joh 5:22, 27 Ditiro 17:31 1 Bakor 6:3 Jut 6 Math 16:27; 25:31-56
Ditiro 17:30-31 Bar 2:6-16 2 Bath 1:5-10 2 Pet 3:1-13 Tsh 20:11-15
2 Bakor 5:10 1 Bakor 4:5 Math 12:36
2. Maikaelelo a Modimo mo go tlhomeng letsatsi le ke go supa kgalalelo ya mautlwebotlhoko a gagwe mo polokong ya bosakhutleng ya baitshenkedwi, le tshiamo ya gagwe mo tshakisong ya bosakhutleng ya ditlhobogwa tse di boikepo le botlhoka kutlo. Mme basiami ba tla a ja boswa jwa botshelo jo bo sa khutleng ba bo ba amogela bottlalo jwa boitumelo le kgalalelo le tebogo ya bosakhutleng fa pele ga Morena. Mme baikipi, ba ba sa itseng Modimo ba sa utlwe Efangele ya ga Jesu Keresete, ba tla a nyelediwa go ya kwa pogisegong ya bosakhutleng, le gore ba otlhaiwe ka tshenyego ya bosakhutlong, ba tswaletswe kwa ntle kgakala le bolengteng jwa Morena le kgalalelo ya nonofo ya gagwe.
Bar 9:22-23 Math 18:8; 25:41 2 Bath 1:9 Bah 6:2 Jut 6 Tsh 14:10-11
Luk 3:17 Mar 9:43, 48 Math 3:12; 5:26; 13:41-42; 24:51; 25:30
3. Keresete o batla gore re tlhaloganye gore go tlaa nna le letsatsi la katlholo, gore re faposiwe mo sebeng, le go fa kgomotso mo go ba ba boifang Modimo mo dipogisong tsa bone. Mme o beile letsatsi le o e le sephiri, gore batho ba ithlotlhore go itshepha gotlhe ba nne ba letile, ka gore ga ba itse nako e Morena a tiang ka yone. Ka jalo ba tshwanetse go nna ba ipaakanyeditse go re, 'Tla, Morena Jesu; tla ka bonako!'
1 Bakor 5:10-11 2 Bath 1:5-7 Mar 13:35-37; Luk 12:35-40 Tshen 22:20